


冊府元龜

二百八十四之七

八十六



			五	漢
		三	三	書
		〇	四	門
		一	五	
		〇	六	
		〇	五	
冊	架	函	號	類

			五	漢
		三	三	書
		六	四	
		五	五	
		〇	〇	
		一	〇	
冊	架	函	號	類

內閣文庫	
番號	漢 5345
冊數	300(86)
函號	365 6



冊府元龜

淺草文庫

淮南李嗣京叅閱

西極文翔鳳訂正

豫章黃國琦較釋

宗室部

承襲第三

宋長沙景王道憐高祖中弟也永初三年薨子成王

義欣嗣元嘉十六年薨子悼王瑾嗣瑾爲元凶所殺

瑾子粲早夭粲弟纂嗣

桂陽恭侯義融長沙景王子元嘉十八年卒子孝侯

宗室部

覬嗣覬為元凶所殺無子弟襲以子晃繼封

臨澧忠侯襲桂陽恭侯子泰始六年卒於中護軍子

旻嗣昇明二年改封東昌縣侯

新喻惠侯義宗長沙景王子元嘉二十一年卒子懷

侯玠嗣為元凶所殺無子弟秉以子承繼封

興安惠侯義賓長沙景王子元嘉二十五年卒子惠

侯綜嗣綜卒子憲嗣

營道僖侯義纂長沙景王少子建元二年卒子長猷

嗣

臨川烈武王道規高祖少弟義熙八年薨無子以長

沙景王第二子義慶為嗣是為康王初太祖少為道

規所養高祖命紹焉咸以禮無二繼太祖還本而定

義慶為嗣明廟主當隨往江陵義慶幼為高祖所知

嘗曰此我家豐城也年十三襲封南郡公永初元年

襲封臨川王元嘉二十一年薨子哀王焯嗣為元凶

所殺子綽嗣

廬陵孝獻王義真高祖子景平二年罪誅無子太祖

以第五子紹為嗣元嘉九年襲封紹無子以南平王

鑠第三子敬先嗣是為恭左無子泰始元年以世祖

第二十一子晉熙王子與為紹嗣封廬陵王未拜為

太宗所殺後更以桂陽王休範第二子德嗣紹元徽二年與休範俱伏誅國復絕三年復以臨澧忠侯襲第三子暠繼紹是爲元王

彭城王義康高祖子元嘉二十八年賜死子泉陵侯允等爲元凶所殺永光元年太宰江夏王義恭表曰臣聞忝祖遠斥猶或慮親降殺霍省序義重全戚故嚴道疾終嗣啓方宇阜陵愆屏身適晚恩竊惟故庶人劉義康昔昧姦回自貽非命沈魂漏籍垂誠來典運革三朝歲盈三紀天地改朔日月再升陶形賦氣威蒙更始義康妻息漂沒早遘盛化衆女孤弱永淪

黔首即情原釁本非已招感事哀煢俯增傷咽敢緣陛下聖化融泰春澤覃被慈育群生仁被泉草實希洗宥還齒帝宗則施及陳根榮加幽壤臣特憑國私冒以誠表塵觸靈威伏紙悲悻詔曰太宰表如此公緣情追遠覽以增懷昔淮楚推恩祚流支裔抑法引親古今成性便以公表付外依旨奉行故泉陵侯允橫罹凶虐可特爲置後

江夏文獻王義恭世子叡爲元凶所害孝武大明二年以第四子子綏繼封食邑二千戶追謚叡曰宣王子綏死後太宗以第八子躋繼義恭爲孫封江夏王

食邑五千戶

南豐王朗江夏文獻王子長子爲元凶所害孝建元年以宗室祗長子歆繼封祗伏誅歆還泰始三年更以宗室韞第二子銳繼封與韞俱死順帝昇明二年復以宗室琨子績繼封

衡陽文王義季高祖子元嘉二十四年薨子恭王嶷

嗣大明七年薨子伯道嗣

南平穆王鑠文帝子孝武即位初薨子敬猷嗣爲前廢帝所殺太宗即位追贈敬猷侍中謚曰懷改封孝王武帝第十八子臨賀王子產爲南平王繼鑠後未

拜被殺泰始五年立晉平王休祐第七子宣曜爲南

平王繼鑠後宣曜被廢還本後廢帝元徽元年立衡

陽恭王嶷第二子伯玉爲南平王繼鑠後

建平宣簡王宏文帝子大明二年薨子景素先以罪

伏誅孝武封長沙成王義欣子勰第三子恬爲秭歸

伏食邑千戶繼宏後

晉熙王昶文帝子景和被害二子長曰思遠次曰

懷遠尋並卒泰始六年以第六皇子燮繼昶封爲晉

熙王

始安王休仁文帝子泰始六年遇害子伯融廢徙丹

陽縣後廢帝元徽元年還京邑襲封

鄱陽哀王休業文帝子孝建三年薨大明六年以山陽王休祐次子士弘嗣封

臨慶冲王休倩文帝子孝建元年始九歲封東平王未拜薨大明七年立第二十七皇子子嗣爲東平王紹休倩後太宗泰始二年還本國絕六年以第五皇子智丹爲東平王繼休倩未拜薨其年追改休倩爲臨慶王以臨賀郡爲臨慶國立第八皇子躋爲臨慶王食邑二千戶繼休倩後明年還本國太祖所愛故前後屢加紹門嗣

巴陵哀王休若文帝子泰始七年賜死子冲襲封

始平孝敬王子鸞孝武帝子爲前廢帝所害明帝即位詔以建平王景素息延年爲嗣追改子鸞封爲始平王食邑千戶延年泰始四年薨時年四歲謚曰冲王明年復以長江王纂子延之爲始平王紹子鸞後武陵王贊明帝子泰始六年生其年詔曰世祖孝武皇帝雖恃尊墮怠勲狹政弛樂飲無饜事因於寧泰任威縱費義緣於務寡故以積怨動天流殃裔嗣景和肇豐義嘉成禍世祖繼體隔憲無遺昔皇家中圯舍生懼滅頽英孝感舊掃雪冤恥勲績墜歷極茲窮

氓繼絕追遠禮訓攸尚况既帝且兄而缺斯典今以第九子智隨奉世祖爲子武陵郡大明之世事均大邦可封智隨武陵王食邑五千戶尋世祖一門女累不少既無釐總義湏防閑諸侯雖不得祖稱天子而事有一家之切且歸寧有所疾疾相營得失是任閨房有稟朕應天在位恩深九族庶此是申追睦之懷教愛之旨

南齊衡陽元王道度太祖長兄卒於宋世建元元年追加封謚無子太祖以第十二子鈞係道度後隆昌元年遇害明帝即位以永陽王子珉仍本國繼元主

爲孫子珉世祖第二十子永泰元年見害年十四復以武陵昭王曄第三子子坦奉元王後

曲江康公遙欣衡陽元王子宣帝兄西平太守本之無後以遙欣繼爲魯孫建武元年封聞喜縣公尋改封曲江公

始安貞王道生太祖次兄宋世卒建元元年封謚長子鳳早卒明帝建武元年追封始安王謚曰靖子遙光嗣遙光生有躓疾太祖謂不堪奉拜祭祀欲封其弟世祖諫乃以遙光襲爵遙光反誅以江陵公寶覽爲始安王奉靖王後安陸昭王緬始安貞王子初封

安陸侯建武元年追封安陸王子寶暉嗣永元元年以安陸郡邊魏改封湘東王

南豐懿伯赤斧太祖從祖弟武帝時卒于家子穎胃襲爵豫章

文獻王疑太祖第二子武帝時薨世子子廉早卒子元琳嗣

竟陵王子良世祖子隆昌中薨子昭胃嗣

梁長沙宣武王懿高祖長兄天監元年追封子元王業襲封業薨子章王孝儼嗣儼薨子睿嗣

永陽昭王敷高祖次兄天監元年追封子恭王伯游嗣

衡陽宣王暢高祖弟天監元年追封子孝王元簡襲封十八年卒子俊嗣

桂陽簡王融高祖次弟天監元年追封無子詔以長沙宣武王第九子象嗣襲封爵是為敦王大同二年

薨子健嗣

臨川靖惠王宏高祖弟普通七年薨子正仁早卒謚曰哀世子無子高祖詔宏子羅平侯正立為世子繇

宏意也宏薨正立表讓長兄正義為嗣高祖嘉而許之封正立千戶侯



建安敏侯正立臨川靖惠王子薨子賁嗣

安成康王秀高祖弟普通元年薨世子機嗣是為煬

王機薨子操嗣後梁文宣踐位復以機子欣襲封

南平元襄王偉高祖弟大通四年薨世子恪嗣是為

靖節王

鄱陽忠烈王恢高祖弟普通七年薨世子範嗣

始興忠武王憺高祖弟普通三年薨長子亮嗣

吳平忠侯景高祖從父弟天監末卒于揚州刺史子

光侯勵嗣

南康簡王績高祖子大通三年薨子會理嗣

廬陵成王續高祖子大同二年薨子安嗣

豫章安王權昭明太子長子大通三年封位江州刺

史薨子棟嗣

陳始興昭烈王談高祖兄即位初追封談有二子續

為文帝項為宣帝高祖以宣帝襲封及文帝入纂時

宣帝在周末還帝以本宗之饗其年十月下詔曰昔

者皇基肇建封樹枝戚朕親地攸在特啓大邦弟項

嗣承門祀雖土宇開建薦饗莫繇重以遭家不造閔

凶夙遣儲貳遐隔輜重未及俛以取身膺茲景命式

脩龜鼎冰谷載懷今既入奉太宗事絕藩祿始興國

廟蒸嘗無主瞻言霜露感尋慟絕其徒封嗣項為安
 成王封第二子伯茂為始興王以奉昭烈王祀賜天
 下為父後者爵一級庶中罔極之情未保山河之祚
 光大二年以罪誅後主太建元年立弟叔敦為始興
 王奉昭烈王祀

未脩定侯擬高祖從子天嘉元年卒子黨嗣
 遂興侯詳高祖從子天嘉五年戰死子正理嗣
 衡陽獻王昌高祖子天嘉元年自長安還都渡江
 瓌而卒無子文帝以第七皇子伯信為嗣
 南康愍王曇朗高祖母弟忠莊王休光之子曇朗為

質於齊天嘉元年詔曰南康王曇朗出隔齊庭反身
 莫測園廟方脩奠饗湏主可以長男方泰為南康世
 子繼南康王後及聞曇朗薨於是襲封
 衡陽獻王昌高祖子初與宣帝俱遷長安天嘉元年
 自周還朝於道薨其年文帝立第七皇子信為衡陽
 王奉獻王祀

桂陽王伯謀文帝子至德元年薨子鄴嗣
 河東康簡王叔獻宣帝子太建十二年薨子孝寬嗣
 後魏上谷公紇羅神元帝曾孫紇羅卒子題賜爵襄
 城公後進爵為王題卒子悉襲降爵為襄公

高涼神武王孤文皇帝子孤薨子斤失職斤子真樂
 頻有戰功後襲祖封明元初改封平陽王薨子禮襲
 本爵高涼王禮薨謚懿王子那襲坐事伏法獻文郎
 位追那功命子紇紹封紇薨子大曹孝文時改封太
 原郡公卒無子國除宣武又以大曹兄從子洪威紹
 松滋侯度高涼神武王孫度卒子乙忻襲爵襄王侯
 乙忻卒子平襲世爵松滋侯以軍功賜艾陵男卒子
 萇孝文時襲爵松滋侯例降賜艾陵伯萇卒子華襲
 爵後於弟子思俱賜死長弟珍子金襲爵艾陵男
 上黨王天穆松滋侯平子天穆卒子儼襲

西河公敦平文帝曾孫敦卒子揆襲

河澗宣公與都平文帝之後與都卒子提襲父侯爵

河澗敬公齊烈帝之玄孫齊卒長子陵襲爵

文安公泥國之踈族泥卒子屈襲

衛王儀秦明王翰子道武時賜死子良明元時追錄

儀功封南陽王以紹儀後

陰平熹王烈衛王儀弟明元時薨子永襲

秦愍王觚陰平王烈弟道武時追謚封子夔為豫章

王以紹觚

崑山王遵昭成帝孫天賜四年坐醉亂失禮賜死葬



以庶人禮子素明元從母所生特見親寵太武初復襲爵是為康王

暨陽子可悉陵嘗山康王子可悉陵卒弟陪斤襲

城陽宣公忠嘗山康王子忠卒子盛襲爵

河澗公德嘗山康王子卒於鎮南將軍德子王欽若等曰失

記其名卒於光州刺史謚曰恭子嶷薨於瀛州刺史謚

曰懿忠子暉襲謚曰文憲

陳留桓王虔昭成帝孫道武時追封又封其子悅為

朱提王悅賜死大武詔弟崇令襲桓王爵是為景王

崇薨子建襲

蒲城侯觀昭成帝孫太武時卒子崙襲爵以公進封

隴西公卒謚定公子琛襲爵

武遂子枝干昭成帝曾孫枝干卒子受洛襲進爵武

邑公

彭城公勃昭成帝孫勃卒長子栗襲

豐陽公庫汗彭城公孫庫汗卒子古辰襲

陽平王熙道武子太嘗六年薨長子靖王他襲他世

子吐萬早卒吐萬子儂王顯襲祖爵子康王世遵襲

孝昌元年薨子敬先襲敬先為元顥所害子宣洪襲

并剌公北陵陽平王熙子為安遠將軍卒子天琚襲

卒子延伯襲

河南王曜道武子泰嘗七年薨長子提大武時襲改封潁川王後改封武昌太安元年薨年四十七謚曰成王長子平原襲爵卒謚曰簡王平原有五子長子和爲沙門捨其子顯以爵讓其次弟鑒鑒固辭詔許其身鑒終之後令顯襲爵鑒乃受之鑒薨之後與鑒子伯宗競求承襲尚書令高肇奏和太和中出爲沙門讓爵於鑒鑒後以和子顯年在弱冠宜承其緒求遜王爵以歸正裔先朝詔終鑒身聽如其請鑒既薨逝和求襲封謹尋詔旨聽傳子顯不許其身和先讓

後求有乖道素請令伯宗承襲宣武詔曰和初以讓鑒而鑒還讓其子交讓之道於是乎著其子早終可聽和襲和正光四年薨子諫襲莊帝初遇害子攀襲河澗王脩道武子泰嘗元年薨無子太武詔河南王曜子羯兒襲脩爵改封略陽

廣平王連道武子始光四年薨無子太武以陽平王熙第二子渾爲南平王以繼連後渾太和十一年從駕巡方山道薨子飛襲後賜名霄太和十七年薨謚曰安王子纂襲景明元年薨於平城子伯和襲永平三年薨謚曰哀王伯和無子以弟文華子仲固襲王

封後為蕭寶寅所害謚曰武真子承宗襲早卒以纂弟安平子仲略繼

京兆王黎道武子神麇元年麇子根襲改封江陽王麇無子獻文以南平王霄二子繼為根後繼襲封江

陽王末安二年麇謚曰武烈長子伯熙卒子亮襲樂平戾王丕明元子後坐事以憂薨子拔襲爵

樂安王範明元子後坐事暴薨長子簡王良文成時襲王末昌

莊王健明元子健薨子仁襲東平王翰太武子翰薨子道符襲爵

臨淮宣王譚太武子譚薨子提襲提以貪縱削除卒孝文時追封長鄉侯宣武時謚曰懿提子昌復封臨淮王末拜而薨謚康王追改封濟南王其子彧紹封彧薨謚文穆王無子弟孝友襲爵

廣陽簡王建太武子建薨子哀王石侯襲石侯薨子定王遣與襲無子石侯弟懿烈王嘉襲嘉薨子忠武王深襲爵深為諸葛榮所害子文獻王湛襲封湛薨子法輪坐叔父瑾謀殺齊文襄事泄合門伏法齊王矜湛覆滅乃啓原之復其爵土

陽平幽王新成景穆長子新成薨長子安壽襲爵孝

文賜名顯

義陽王子孝陽平幽王子後降為公卒子贊嗣

京兆王子推景穆子薨子太興襲後為沙門太和二

十二年終子昂宿襲薨子文琮襲

汝陽王仲景京兆王大興子孝靖時薨子冲襲

濟陰惠王小新成景穆子薨子鬱襲位以黷貨賜死

爵除詔以鬱弟偃子誕立為嫡孫特聽紹封是為靜

王子撫襲先是鬱長子彌以世嫡應襲先爵為季父

尚書僕射麗因于氏親寵遂奪彌王爵建義元年彌

子暉業訴復王爵永安三年謚彌為文獻王初彌嘗

夢人謂之曰君身不得傳世封其紹先爵者君長子

紹遠也彌卒即加暉業終如其言

汝陰靈王天賜景穆子孝文時以罪削除及卒復本

爵子威王逞嗣逞薨子文王脩嗣脩薨子均入西魏

封安昌王薨謚平王子則襲封

樂良厲王萬壽景穆子以憂薨子康王樂平襲樂平

薨子長命襲坐殺人賜死子忠孝明時復前爵

廣平殤王雒侯景穆子和平二年薨無子後以陽平

幽王第五子正後之為度支尚書正表引樂陵章武

之例求紹雒侯封紹付尚書議尚書奏聽襲封以明

興絕之義後加鎮東將軍詔曰故廣平殤王稚侯躰
 自恭宗茂年薨殞國除祀廢不祀忽諸正親同若子
 私繼歲久宜樹維城永茲磐石可特襲王爵後改封
 東平郡王卒改濟南王第四子獻襲獻薨子祖育襲
 任城康王雲景穆子雲薨長子文宣王澄太和中襲
 封澄薨第四子文王燹襲燹卒子度世襲
 高平剛侯嵩任城康王子爲蒼頭李太伯所害第二
 子携襲爵除給事中薨子景遠襲
 南康惠王禎景穆子禎薨子英改封中山王英累遷
 尚書僕射薨謚獻武王次子熙好學有文才然輕躁

浮動英慮非保家之主嘗欲廢之立第四子畧爲世
 子宗義不聽略又固請乃止延昌二年襲封時領軍
 于忠執政熙忠之壻也驟遷平西將軍熙薨謚之曰
 文莊王長子景獻次仲獻次叔獻並與熙同遇害叔
 獻弟叔仁以年幼獲全襲先爵除征虜將軍復須遇
 害子琳襲熙弟誘亦被誅子始伯襲誘弟畧爲爾朱
 榮所害謚曰文貞子景式襲略弟纂與熙俱死子獻
 襲

武邑王義興南安惠王子義興薨子述襲
 城陽康王長壽景穆諸子子多侯早卒次子鸞始繼



叔父章武敬王及兄卒還襲父爵鸞薨子徽宣武時襲封後為爾朱兆所殺出帝初子延襲爵徽兄顯死於晉陽刺史子彥昭襲

章武敬王太維景穆諸子皇興二年薨無子孝文初以南安惠王第二子彬為後襲爵彬卒長子融死王事子景哲襲景哲弟郎郎後廢帝子黃頭襲封安定王改封安平王融弟凝末熙二年終安東將軍兗州刺史子彥友襲武定中為光祿大夫凝弟湛位至少卿遇害子俊襲

樂陵康王胡兒景穆子薨無子獻文詔胡兒兄汝陰

王天賜之第二子承全復之襲封後改名思譽正始四年薨謚密王子景略宣武時襲封位至幽州刺史薨謚惠王子霸休襲

安定靖王休景穆子休薨長子安幼早卒次子燮襲燮薨子超襲時以胡珍國封安定公改封北平王後復本封遇害子孝景襲

樂安厲王長樂文成子以罪賜死於家子詮襲詮薨謚曰武康子鑒襲

廣川莊王略文成子太和四年薨子諧襲諧薨謚曰剛子靈道襲

河澗孝王若文成子年十六薨詔京兆康王子太安為後太安子若為從弟非相後之義廢以齊郡王子琛繼

安豐王猛獻文子太和中薨於營州刺史子延明襲咸陽王禧獻文子以罪賜死正光中復禧王爵子坦襲改封敷城王永安初復本封咸陽郡王

趙郡靈王幹獻文子幹薨長子謚宣武初襲封謚薨謚曰貞景子毓襲莊帝初遇害謚曰宣恭無子詔以謚弟讜子為後襲爵

趙郡孝懿王謀靈王子莊帝初封魏郡王謀本年長

應襲王封其父靈王寵愛其弟謚以為世子莊帝詔復謀封趙郡王薨子熈襲

廣陵惠王羽獻文子羽薨子恭襲

高陽文穆王雍獻文子雍與嫡子大同時遇害太子斌太兄安德縣公端與雍俱遇害子峻襲爵太弟濟

北郡王獻與雍俱遇害子徽普泰中襲爵後坐謀逆伏法獻弟誕薨謚曰文獻無子以斌第二子子亮為後

彭城武宣王勰獻文子勰薨嫡子邵襲莊帝時遇害子紹襲遷給事黃門侍郎靈太后詔曰故太師彭城



武宣王道隆德盛功高徽管協契先朝導揚末命扶
 濟濟難效漢北之誠迭往奉居盡魯南之節宗社賴
 之以安皇基繇之末固而謙光守約屢擢增邑之賞
 辭多受少終保初錫之封非所謂追舊報恩念勲酬
 德者也可以前後所封戶別封三子為縣公食邑各
 一千戶庶以少慰亡蒐微申朝典子直封真定縣開
 國公以病卒子寬襲王爵始平貞王子正與兄邵俱
 同時遇害子欽襲

北海平王詳獻文子詳薨子顯襲後遇害子婆羅襲
 北濟趙郡貞王琛神武弟天平中薨子獻嗣獻遇害

子釐信嗣

陳留文恭王惠寶神武弟早亡以清河王嶽第十子
 敬文嗣

清河昭武王嶽神武從父弟天平中薨子勵嗣

廣平公盛神武從叔祖薨無子以兄子子瑗嗣天保
 初改封平昌王

長樂太守靈山神武族弟終於長樂太守子懿卒於
 武平鎮將無子文宣帝以靈山從父兄齊州刺史楚
 國子伏護為靈山後復護卒孫乂襲

陽周武昭公末樂高祖兄子末樂卒無子從兄恩宗

以第二子緒為後襲爵天保初改封脩城郡王
 永安簡平王浚神武子為文宣所殺至乾明元年贈
 太尉無子詔彭城王浹第二子淮嗣
 平陽靖康王淹神武子河清三年薨子德素嗣
 彭城景思王浹神武子河清三年遇害子寶德嗣位
 開府兼尚書左僕射
 上黨剛肅王渙神武子為文宣帝所殺渙無嫡子庶
 長子寶嚴以清河二年襲位金紫光祿大夫開府儀
 同三司
 襄城景王清神武子天保二年薨無子詔以嘗山王

演第二子亮嗣

高陽康穆王湜神武子天保十年薨子士義襲爵
 博陵文簡王濟神武子天統五年薨子智襲爵
 馮翊王潤神武子潤薨子茂德嗣
 漢陽敬王維字敬延神武子天寶五年薨無子以任
 城王第三子建德為後
 河南康獻王孝瑜文襄子武成時薨子弘節嗣
 河澗王孝琬文襄子為文宣所殺子正禮嗣
 太原王紹德文宣子為武成所殺武平元年詔以范
 陽王子辦才為後襲太原王

樂陵王百年孝昭子爲武帝所害後主詔以襄城王子自澤襲爵樂陵

琅邪王儼武成子爲後主所殺以平陽王淹孫世後

嗣

後周邵惠公顥太祖長兄保定初追封長子什肥爲

北齊神武所害追贈大冢宰襲爵郡公謚曰景

杞烈公連

一云簡公

邵惠公子魏末戰歿以章武公遵子

亮嗣之亮初封襲爵累遷宗師中大夫卒詔以弟椿

爲烈公之後

虞國公仲太祖再從父保定中追封子興生值亂兵

與仲相失又幼冲莫知其戚屬遠近高祖以苾莊公

維嗣

宋獻公震文帝子尚西魏文帝女薨無子以世宗第

三子寔爲嗣

隋義城縣公處綱高祖族父開皇初贈其父鍾蔡爲

柱國尚書令義城縣公以處綱襲焉

河澗王行高祖從祖弟大業六年追封郇王子慶嗣

滕穆王瓚高祖母弟開皇十一年薨子綸嗣以罪徙

朱崖大業中弟說襲封滕王以奉穆王嗣

道悼王靜滕穆王子出繼叔父嵩嵩在周代以太祖

軍功賜爵興城公早卒高祖踐位追封道王謚曰宣以靜襲焉

衛昭王爽高祖異母弟開皇中薨子集初封遂安王尋襲封衛王

秦孝王俊高祖子開皇二十年為妃崔氏所毒薨崔氏賜死二子浩湛不合承嗣煬帝即位以浩為秦王以奉孝王嗣

蔡王智積高祖弟愨之子愨後周時戰死高祖受禪追封蔡王以智積襲焉

康未安莊王孝基高祖從父弟武德二年戰歿無子

以從兄韶子道立為嗣封高平郡王

長平肅王叔良高祖從父弟叔良薨子孝協嗣

襄武王琛高祖從父兄子武德三年薨子儉嗣

河澗元王孝恭齊武王弟貞觀十四年薨子崇義嗣

淮陽莊王道玄高祖從父兄子武德五年薨無子詔

封其弟武都郡公道明為淮陽王令主道玄祀

衛懷王玄霸高祖子早薨無子武德元年追贈衛王

四年封大宗子泰為宜都王以奉其祀泰後徙封於

越又以宗室贈西平王瓊之子保定為嗣

巢刺王元吉高祖子以罪誅貞觀十六年追封以曹

王明為後

楚安王智雲高祖子武德元年追封無子三年以太

宗子寬為嗣寬薨貞觀二年復以濟南公世都子靈

龜嗣靈龜卒子福嗣

荆王元景高祖子永徽三年坐謀逆賜死後追封沉

黎王以渤海王奉慈子長沙為嗣降爵為侯神龍初

追復爵土并封其孫逖為嗣荆王

徐王元禮高祖子咸亨三年薨子淮南王茂嗣茂以

流死振州神龍初封茂子瓘為嗣徐王瓘開元中卒

子延年嗣二十六年封嗣徐王後坐贓貶杭郡司馬

卒永泰元年女婿黔中觀察使趙國珍入朝請以延

年子前施州刺史諷為嗣因封嗣徐王

韓王元嘉高祖子以謀逆坐誅神龍初追復爵土并

封其第五子訥為嗣韓王開元十七年卒子叔璩為

嗣韓王

彭思王元則高祖子永徽二年薨無子以霍王元軌

子絢嗣龍朔中封南昌王子志暕神龍初封嗣彭王

鄭惠王元懿高祖子咸亨四年薨子敬上元初封為

嗣鄭王官至鄂州刺史神龍初又封敬嫡子希言為

嗣鄭王



霍王元軌高祖子垂拱四年坐謀逆與長子緒俱死
神龍初追復爵土封緒男輝爲嗣霍王
號莊王鳳高祖子上元元年薨子平陽郡王翼嗣官
至光州刺史永隆二年卒子寓嗣則天時失爵神龍
初封鳳嫡孫邕爲嗣號王邕開元十五年卒子臣嗣
道孝王元慶高祖子麟德元年薨子臨淮王誘嗣官
至澧州刺史淳中中坐贓削爵次子詢壽州刺史詢
子徽神龍初封爲嗣道王景雲元年卒子諫開元二
十五年襲封嗣道王
鄧康王元裕高祖子麟德二年薨無子以弟汪王子

詳子廣平公旦嗣神龍初封旦子孝先爲鄧王景龍
四年制尚乘奉御事伯潛繼鄧王元裕後
舒王元名高祖子永昌中與子亶俱遇害封亶子津
爲嗣舒王開元中卒子萬嗣天寶二年卒子藻嗣天
寶九載封嗣舒王建中元年九月改封嗣郢王
魯王靈夔高祖子永徽四年以罪自殺有二子長子
誥封清河王少子藹封范陽王爲酷吏所陷神龍初
封藹子道堅爲嗣魯王道堅卒子宇嗣寶應元年皇
太子封爲魯王改宇爲嗣鄒王宇薨子萃嗣
江安王元祥高祖子永隆元年薨中興初以元祥子

鉅鹿郡公晃子欽嗣江王

密貞王元曉高祖子上元三年薨子南安王穎嗣神龍初封穎弟亮子曇爲嗣密王開元五年五月制曰興滅國繼絕世天下歸心焉况乃仁不遺親德必在祀光復土宇率繇教義者哉故徐州刺史密王元曉望重天人地居藩屏家邦伊賴休戚是均乃者王室多難睿圖中缺凡我宗子咸從殛竄神龍初歲寶運紹興爰命近屬以爲後嗣而胄緒凋翳是非紛雜曇子乘隙妄尸茅土神且不歆非類人亦奚祀非族莫享無主永懷惻然其封元曉姪孫銀青光祿大夫行

太僕少卿員外置同正員東莞郡開國公徹爲嗣密王以奉其祀

滕王元嬰高祖子文明元年薨子長樂王循琦嗣兄弟六人垂拱中並陷詔獄神龍初以循琦弟循珂嗣天寶初卒子湛然嗣十二載封嗣滕王

吳王恪太宗子永徽中以罪誅有子四人仁瑋琨瓊並流于嶺表尋追封恪爲鬱林王神龍中封琨子祗爲嗣吳王

濮恭王泰太宗子永徽三年薨子欣封嗣濮王則天初陷酷吏獄貶昭州別駕卒子嶠本名餘慶中興初

封嗣濮王

蜀悼王愔太宗子乾封二年薨封子璠為嗣蜀王永

昌中配流歸誠州而死神龍初以吳王恪孫郎陵王

瑋子榆為嗣蜀王

蔣王暉太宗子上元年自殺子熾嗣垂拱中為則天

所害子銑早卒神龍初封銑子紹宗為嗣蔣王卒子

欽福嗣

越敬王真太宗子則天時與其子琅邪王冲謀復唐

室事敗而死開元四年十月癸未詔曰九族以親克

敦其教百代必祀允章厥德故越王貞執心不回臨

事能斷粵自藩國勤于王家光宅之後寶圖將缺懷

劉章之輔漢追鄭武之翊周遂能奮不顧身率先唱

義雖英謀未尅而忠節居多嗣絕國除年踰二紀奠

享淪廢朕甚憫焉夫存或高功歿有明祀數屯則安

衆罹禍時泰則高陽紹封永言興繼式備典冊其封

貞姪孫故許王男左監門衛將軍員外置同正員薨

國公琳為嗣越王以奉其祀

紀王慎太宗子則天時流死中興初追復官爵令以

禮改葬封慎少子鐵誠為嗣紀王後改名澄開元初

歷德棣冀三州刺史左驍衛將軍薨子行周嗣

江瑒王囂太宗子貞觀六年薨以吳王恪孫玄爲嗣
江王景龍四年以吳王孫禘繼江王囂後
趙王福太宗子貞觀中出繼隱太子建成咸亨元年
薨中興初封蔣王憚孫思順爲嗣趙王

曹王明太宗子末隆中坐與庶人賢通謀自殺有二
子南州別駕零陵王俊黎國公傑垂拱中並遇害中
興初封傑子裔爲嗣曹王裔叔父備自南州還又封
備爲嗣曹王後備詔慰忠州叛獠沒于賊又封裔爲
王卒子戢嗣戢卒子臯嗣

澤王上金高宗子載初元年武承嗣使酷吏周興誣
告上金自縊死子義璉義珍義玫義璋義環義瑾義
璣七人並配流死神龍初追復爵土開元十四年四
月制曰先親之義所以敦叙廣封之道所以利達故
澤王男義珣漸慶元族分榮帝系早承光寵列在戚
藩中因間言久不立嗣既宗英有譽而拜翰用崇宜
順景封之典俾弘宅土之命可封嗣澤王先是義珣
竄在嶺外匿於傭保之間及紹封無幾有人告珣非
上金子假冒寵爵義珣不能自明復流于嶺外開元
初封許王素節之子璆爲嗣澤王繼上金後十二年
玉真公主表稱義珣寔上金遺裔被嗣許王璣兄弟

承襲

利其封爵謀構廢之繇是削瑯王爵復詔義珣為嗣
王拜率更令因是諸宗室非本宗襲爵自中興已後
外繼為嗣王者皆令歸宗削其爵邑貞元五年十二
月封故澤王讓男潤為嗣澤王
許王素節高宗子則天時與子九人並遇害惟少子
琳璿璆欽故以年少特令長禁雷州神龍初封璿為
嗣許王璿開元十一年為衛尉卿以抑伯澤王上金
男義珣不得承襲以弟璿繼之玄宗遠遣璿為鄂州
別駕於是下詔繼其外繼乃以故澤王上金男義珣
為嗣澤王江王禕為信安郡王嗣蜀王榆為廣漢都

王嗣密王徹為濮陽郡王嗣曹王臻為濟國公嗣趙
王踞為中山郡王武陽郡王維宗為澧國公璿天寶
六載卒贈蜀郡大都督璿晚有子命璿子益為嗣及
卒有解需二子皆幼孺十一載益襲封許王十四載
解娶楊鈺女乃襲許王
雍王賢高宗子為則天所譖廢為庶人幽於別所永
淳二年遷於巴州自殺追封為雍王子守禮授太子
洗馬封為雍王
讓皇帝憲睿宗子累封寧王開元二十八年薨追冊
為皇帝長子汝陽郡王璿肅宗元年建辰月嗣寧王

册封元龜 宗室部 卷之二十四 二十七

璿薨以其子太常寺寺丞擯為嗣寧王食邑三千戶仍試太僕少卿

惠莊太子撫睿宗子初封申王無子開元七年正月

制曰建侯樹藩命賢裂土以悼戚屬乃率典嘗司徒

兼絳州刺史上柱國申王撫玉林分彩銀河疏液厥

保慶靈未繁裔緒宋王憲男嗣英 一云宋王男珣 魯庭學禮

楚館聞詩德輝日盛忠槩寡立宜其擇猶子之序居

承嫡之位廬江太郡形勝攸屬用圖爾居莫如茲地

是錫分珪之寶俾成磐石之崇可封懷寧郡王食邑

三千戶嗣英早卒撫開元十二年薨天寶三載又以

讓帝子疇為嗣申王

岐王範睿宗子開元十四年薨子瑾封河東郡王暴

卒天寶三載以惠宣太子男略陽公珍為嗣岐王

惠宣太子業睿宗子初封薛王開元二十二年薨子

珣封嗣薛王

奉天皇帝琮玄宗子累封慶王天寶十一載薨無子

十三載十一月封故靖德太子男休為嗣慶王 王欽若等

曰唐自玄宗已後皇子封王王子封郡王不任嗣襲故此後皆闕

梁廣王全昱太祖長兄貞明中卒封長子衡王友諒

為嗣廣王

淮南李嗣京參閱
 西極文翔鳳訂正
 豫章黃國琦較釋
 宗室部 二十四
 忠一
 傳曰忠為令德蓋策名委質有死無二之謂也乃有
 體自天極列于藩維承光日月同休宗社而內懷明
 德發於精衷自晦以掩君惡建義以雪國耻定策佐
 命以安天下扶危持顛以濟大難守節而無苟拒惡

册府元龜

宗室部 二十四

忠一

傳曰忠為令德蓋策名委質有死無二之謂也乃有
 體自天極列于藩維承光日月同休宗社而內懷明
 德發於精衷自晦以掩君惡建義以雪國耻定策佐
 命以安天下扶危持顛以濟大難守節而無苟拒惡

而靡憚勵恭慎之節竭謨明之效周旋攸助彌綸罄
盡奉侍勤瘁誠言敦篤至或挺身變亂而罹害感慨
宗國而亡身抗志不撓瞑目無悔斯皆仁厚成於自
然純亮表於性質挺成一之德隆在三之義千載之
下凜乎其有生氣矣

商箕子紂之親戚也紂為淫泆箕子諫不聽人或曰
可以去矣箕子曰為人臣諫不聽而去是彰君之惡
而自悅於民吾不忍為也乃被髮佯狂而為奴

漢燕王澤聞呂太后終澤乃曰帝少

王欽若等曰帝謂呂后所立惠

帝後宮諸呂用事諸劉孤弱引兵與齊王合謀西欲

誅諸呂至梁聞漢灌將軍屯滎陽澤還兵徭西界遂

跳驅至長安

齊王傳云使祝午給琅邪王琅邪王馳見齊王齊王因留琅邪王而使祝午盡

發琅邪國而并將其兵琅邪王既見欺不得友國乃說齊王求入問計事齊王以為然乃益具軍送琅邪王與此傳不同疑此傳誤也代王亦從代至諸將相與琅邪王共

立代王是為孝文帝

衡山王勃景帝初七國反吳使者至衡山衡山王堅
守無心吳楚已破衡山王來朝帝以為貞信乃勞苦
之日南方卑濕徙王於濟北以褒之
濟北王胡以為武帝且封禪上書獻泰山及其旁邑
天子以它縣償之

武平侯璜王莽居攝一年以舉兵誅莽死

陵鄉侯魯王莽建國六年以舉兵欲誅莽死

後漢慎侯賜光武族兄更始初封賜為宛王典將六

部伯升初起置六部之兵後赤眉破更始所賜領六部亦稍散

畔乃去宛保育陽間光武即位西之武關迎更始妻

子將詣維陽帝嘉賜忠故封為慎侯

劉虞為幽州牧就拜太尉初平二年冀州刺史韓馥

渤海太守袁紹及山東諸將議以朝廷勿冲逼於董

卓遠隔關塞不知存否虞以宗室長者欲立為主乃

遣故樂浪太守張岐等齎議上虞尊號虞見岐等厲

色叱之曰今天下紛亂主上蒙塵吾被重恩未能清

雪國耻諸君各據州郡宜共戮力盡心王室而反造

逆謀以相垢誤耶故拒之馥等又請虞領尚書事承

制封拜復不聽遂收斬使人

魏曹洪字子濂太祖從弟也太祖起義兵討董卓至

滎陽為卓將徐榮所敗太祖失馬賊追甚急洪下以

馬授太祖太祖辭讓洪曰天下可無洪不可無君遂

步從到汴水水深不得渡洪循水得船與太祖共濟

還奔譙

齊王族祖問字元首魏世諸侯王多所抑損問上書



曰臣聞古之王者必建同姓以明親親必樹異姓以明賢賢故傳曰庸勳親親昵近尊賢書曰克明俊德以親九族詩曰懷德維寧宗子維城由是觀之非賢無與興功非親無與輔治夫親親之道專用則其漸也微弱賢賢之道偏任則其弊也劫奪先聖知其然也故博求親疎而並用之近則有宗盟藩衛之固遠則有仁賢輔弼之助盛則有與共其治衰則有與守其土安則有與享其福危則有與同其禍夫然故能有國家保其社稷歷紀長久本支百世也今魏尊賢之法雖明親親之道未備詩不云乎鸛鳴在原兄弟

急難以斯言之明兄弟相救於喪亂之際同心於憂禍之間雖有閭墻之忿不忘禦侮之事何則憂患同心也今則不然或任而不重或釋而不任一且疆場稱警閨門反拒股肱不扶胸心無衛臣竊惟此寢不安席思獻丹誠貢策天闕謹撰合所聞叙論成敗論允數千言是時天子幼稚問與以此論感悟曹爽爽不能納

蜀北地王諶景耀末鄧艾兵至譙周勸後主降後主將從譙周之策諶怒曰若理窮力屈禍敗必及便當父子君臣背城一戰同死社稷以見先帝可也後主

不納遂送璽綬是日譔哭於昭烈之廟先殺妻子而後自殺左右無不爲泣者

晉惠帝西遷范陽王虓與從兄平昌公模長史馮嵩等刑白馬歃血而盟推東海王越爲盟主虓都督河北諸軍事驃騎將軍持節領豫州刺史劉喬不受越等節度乘虎破許虓自板渡河王浚表虓領冀州刺史資以兵馬虓入冀發兵又南濟河破喬等河澗王顥聞喬敗斬張方傳首於越越與虓西迎帝而顥出奔於是奉天子還都拜虓爲司徒齊王攸爲驃騎將軍每朝政大議悉心陳之

汝南王亮爲太宰錄尚書事楚王瑋有勲而好立威亮憚之欲奪其兵權瑋甚憾乃承賈后旨誣亮與衛瓘有廢立之謀矯詔遣其長史公孫宏與積弩將軍李肇夜以兵圍之帳下督李龍自外有變請距之亮不聽俄然楚兵登墻而呼亮驚曰吾無二心何至於是有詔書其可見乎宏等不許促兵攻之長史劉準謂亮曰觀此必是姦謀府中俊又如林猶可盡力距戰又弗聽遂爲肇所執乃歎曰我之忠心可破示天下也如何無道枉殺不辜是時大熱兵人坐亮于車下時人憐之爲之交扇將及日中無敢害者瑋出

光緒二十五年 卷之五十五
今日能斬亮者賞布千匹遂爲亂兵所害投于北門之壁鬚髮耳鼻皆悉毀焉

淮南王允元康九年入朝初愍懷之廢議者將立允爲大弟會趙王倫廢賈后詔遂以允爲驃騎將軍開府儀同三司侍中都督如故領中護軍允性沈毅宿衛將士皆敬服之倫既有僭逆志允陰知稱病不朝密養死士潛謀誅倫倫甚憚之轉爲太尉外示優崇實奪其兵也允稱病不拜倫遣御史逼允收官屬以下劾以大逆允恚視詔乃孫秀手書也大怒便收御史將斬之御史走而獲免斬其令二人厲色謂左右

曰趙王欲破我家遂率國兵及帳下七百人直入大呼曰趙王反我將攻之佐淮南王者左祖於是歸之者甚衆允將赴宮尚書左丞王典閉東掖門允不得入遂圍相府允所將兵皆淮南奇才劍客也與戰頻敗之倫兵死者千餘人太子左率陳徽勒東宮兵鼓譟於內以應允結陳於承華門前弓弩齊發射倫飛矢雨下主書司馬畦秘以身蔽倫箭中其背而死倫官屬皆隱樹而立每樹輒中數百箭自辰至未徽兄淮時爲中書令遣麾騶虞幡以解圍倫子虞爲侍中在門下省密要壯士約以富貴於是遣司馬督護伏

裔領騎四百從宮中出舉空版詐言有詔助淮南王
 允允不之覺開陣納之下車受詔為裔所害時年二
 十九初倫兵敗皆相傳曰已擒倫矣百姓大悅既而
 聞允死莫不歎息
 齊王冏趙王倫密與相結廢賈后以功轉遊擊將軍
 冏以位不滿意有恨色孫秀微覺之且憚其在內出
 為平東將軍假節鎮許昌倫篡遷鎮東大將軍開府
 儀同三司欲以寵安之冏因衆心怨望潛與離狐王
 盛穎川王處穆謀起兵誅倫倫遣腹心張烏覘之烏
 反曰齊無異志冏既有成謀未發恐事泄乃與軍司

管襲殺穆送首與倫以安其意謀定乃收襲殺之遂
 與豫州刺史何曷龍驤將軍董艾等起兵遣使告成
 都河澗葦山新野四王移檄天下征鎮州郡縣國咸
 使聞知揚州刺史郗隆承檄猶豫未決參軍王邃斬
 之送首于冏冏屯軍陽翟倫遣其將冏和張泓孫輔
 出堞坂與冏交戰冏軍失利堅壘自守會成都軍殺
 倫衆於黃橋冏乃出軍攻和等大破之及王與廢倫
 惠帝反正冏誅討賊黨既畢率衆入雒頊軍通章署
 甲士數十萬旌旗器械之盛震於京都天子就拜大
 司馬加九錫之命備物典策如宣景文武輔魏故事



問於是輔政居攸故宮

成都王穎轉鎮北大將軍趙王倫之篡也進征北大將軍加開府儀同三司及齊王冏舉義穎發兵應冏以鄴令盧志爲左長史頓丘太守鄭琰爲右長史黃門侍郎程收爲左司馬陽平太守和演爲右司馬使兗州刺史王彥冀州刺史李毅督護趙驤石超等爲前鋒羽檄所及莫不響應至朝歌衆二十餘萬趙驤至黃橋爲倫將士荷許超所敗死者八千餘人士衆驚駭穎欲退保朝歌用盧志王彥策又趙驤率衆八萬與王彥俱進倫復遣孫會劉琨等率三萬人與荷超

合兵距驤等精甲耀日鐵騎前驅荷既戰勝有輕驤之心未及溫十餘里復大戰荷等奔潰穎遂過河乘勝長驅左將軍王輿殺孫秀幽趙王倫迎天子反正穎入京都誅倫使趙驤石超等助齊王冏攻張泓於陽翟泓等遂降冏始率衆入雒自以首建大謀遂擅威權穎營于大學及入朝天子親勞焉

東海王越初爲中書令徙侍中遷司空領中書監成都王穎攻長沙王乂固守維陽殿中諸將及三部司馬疲於戰守密與左衛將朱默夜收乂別省逼越爲主啓惠帝免乂官事定越稱疾遜位帝不許加守尚

書令太安初帝北征鄴以越爲大都督六軍敗越奔
下邳徐州都督東平王琳不納越徑還東海成都王
穎以越兄弟宗室之羹下寬令招之越不應命帝西
幸以越爲太傅與太宰顥夾輔朝政讓不受東海中
尉劉洽勸越發兵以備穎越以洽爲左司馬尚書曹
馥爲軍司既起兵琳懼乃以州與越越以司空領徐
州都督以琳領兗州刺史越三弟並據方任征伐輒
選刺史守相朝士多赴越而河澗王顥挾天子發詔
罷越等皆令就國越唱義奉迎大駕還復舊都率甲
卒三萬西次蕭縣豫州刺史劉喬不受越命遣子祐

距之越軍敗范陽王颯遣都護田徽以突騎八百迎
越遇祐於譙祐衆潰越進屯陽武山東兵盛關中大
懼顥斬送張方首求和尋變計距越越率諸侯及鮮
卑許扶歷駒次宿歸等步騎迎惠帝反雒陽詔越以
大傅錄尚書以下邳濟陽二郡增封及懷帝即位委
政於越吏部郎周穆清河王暉舅越之姑子也與其
妹夫諸葛玖共說越曰主上之爲大帝張方意也清
河王本太子爲群凶所廢先帝不諱多疑東宮公盍
思伊霍之舉以寧社稷乎言未卒越曰此豈宜言耶叱
左右斬之以玖穆世家罪止其身因表除三族之法

譙王承爲湘州刺史王敦構難遣參軍桓熙說承以
劉隗專寵令便討擊請承以爲軍司以軍期上道承
歎曰吾其死矣地荒人鮮勢孤援絕赴君難忠也死
王事義也惟忠與義夫復何求便欲唱義而衆心疑
惑承曰吾受國恩義無有二府長史虞惺慷慨有志
節謂承曰王敦居分陝之任而一旦作逆天地所不
容人神所痛疾大王宗室藩屏寧可從其僞邪使其
電奮存亡以之於是與惺及弟前丞相掾望建呂太
守長沙王循衡陽太守淮陵劉翼等共盟誓因桓熙
馳檄湘州指期至巴陵零陵太守尹奉首同義謀出

軍營陽於是一州之內皆同義舉乃使虞望討諸不
服斬湘東太守鄭澹澹敦姨夫也敦遣南蠻校尉魏
又將軍李嘗田嵩等甲卒二萬以攻承承且戰且守
待救於尹奉虞望而城池不固人情震恐或勸承南
投陶侃又云可退據零桂承曰吾舉義衆志在死節
寧偷生苟免爲奔敗之將乎事之不濟其令百姓知
吾心耳城沒被害

宋江夏王義恭遷侍中未拜元凶邵肆逆遣召義恭
先是詔召太子及詔諸王各有嘗人慮有詐妄致害
者至是義恭求嘗所遣傳詔邵遣之而後人義恭請

罷兵凡府內兵仗並送還臺進位太保服侍中服又
領太宗師世祖入討邵疑義恭有異志使入任尚書
下省分諸子並住神虎門外侍中下省邵聞世祖已
次近路欲悉力逆之決戰中道義恭慮世祖船乘邵
小邵豕突中流容能爲患乃進說曰割棄南岸柵斷
石頭此先朝舊法以逸待勞不憂不破也邵從之世
祖前鋒至新亭邵挾義恭出戰嘗錄在左右故不能
自拔戰敗使義恭於東堂閱將義恭先使人具船於
東右渚因單馬南奔始濟淮追騎已至北岸僅然得
免邵大怒遣始興王濬就西省殺義恭十二子世祖

時在新林浦義恭既至上表勸世祖即位
彭城王義康錄尚書事文帝有虛勞疾每意有所想
便覺心中痛裂屬續者相係義康入侍醫藥盡心衛
奉湯藥飲食非口所嘗不進或連夕不寐彌日不解
衣內外衆事皆專決施行
建平王宏文帝第七子元凶弒立以宏爲左將軍冊
陽尹又以爲散騎嘗侍領軍將軍江州刺史祖入討
邵錄宏殿內世祖先嘗以一手板與宏宏遣左右親
信周法道齋手板詣世祖事平以爲尚書左僕射使
本迎太后

營浦侯遵考子琨之為竟陵王誕司空主簿誕作亂以爲中兵參軍不就繫繫數十日終不受乃殺之追贈黃門郎詔吏部尚書謝莊爲之誄

南郡王義宣爲荆雍都督元嘉三十年遷司徒中軍將軍揚州刺史侍中如故未及就徵值元凶弒立以義宣爲中書監太尉領司徒侍中如故義宣聞之即時起兵徵聚甲卒傳檄遠近會世祖入討義宣遣參軍徐遺寶率衆三千助爲前鋒

劉韞長沙王道憐之孫爲宣城太守晉安王子勛爲亂大衆屯據鵲尾攻逼宣城于時四方牧守莫不同

逆惟韞棄郡赴朝廷太宗嘉其誠以爲黃門郎太子中庶子侍中

劉襲長沙王道憐之孫爲安城太守晉安王子勛爲逆襲據郡拒之勛遣軍攻圍不能下太宗嘉之以爲鄧州刺史封建陽縣侯食邑五百戶

南齊豫章王疑嘗謂世祖曰古來言願陛下壽等南山或稱萬歲此殆近貌言如臣所懷實願陛下極壽百年亦足矣帝曰百年復何可得止得東西一百於事亦濟

南康縣侯子恪建武中遷輔國將軍吳郡太守及司



馬王敬則於會稽舉兵反奉子恪爲名明帝悉召子恪子弟親從七十餘人入西省至夜當害之會子恪棄郡奔歸是日亦至明帝乃止以子恪爲太子中庶子

梁長沙元王弟藻出爲使持節督南徐州刺史侯景亂藻遣長子或率兵入援及城開加散騎嘗侍大將軍景遣其儀同蕭邕代之據京口藻因感氣疾不自療或勸奔江北藻曰吾國之台鉉任寄特隆既不能誅剪逆賊正當同死朝廷安能投身異類欲保餘生因不食累日薨

尋陽王大心爲郢州刺史大同七年徵爲侍中兼石頭戍軍事太清元年爲雲麾將軍江州刺史二年侯景寇京邑大心招集士卒遠近之衆至數萬與上流諸軍赴援宮闕三年城陷上平侯蕭韶南奔宣密詔加散騎嘗侍進號平南將軍

南郡王大連太清元年出爲使持節輕車將軍東揚州刺史侯景入寇京都大連率衆四萬來赴及臺城沒援軍散復歸揚州
河東王譽爲南中郎將湘州刺史未幾侯景寇京邑譽率軍入援至青草湖臺城沒有詔班師

南浦侯淮安城王秀子也侯景之亂守東府城陷握節死之
邵陵王綸太清二年侯景反既陷東府城綸率四豐公大春新塗將軍末安侯確趙武將軍安南鄉侯駿前譙州刺史趙伯超武州刺史蕭弄璋步兵較尉尹思何等馬步三萬發自京口直據鍾山景黨大駭具船舟咸欲逃散分遣萬餘人距綸綸擊大破之斬首千餘級旦日景復陳兵覆舟山北綸亦列陣以待之景不進相持會日暮景引軍還安南鄉侯駿率數十騎挑之景回軍與戰駿退時趙伯超陳於玄武湖北

見駿急不赴乃率軍前走衆軍因亂遂敗績綸奔京口賊盡獲輜重噐甲斬首數百級生俘千餘人景既攻臺城綸與臨成公大連等自東道集于南岸荊州刺史湘東王遣世子方等兼司馬吳畢天門太守樊文皎下赴京師營于湘子岸前高州刺史李廷任前司州刺史羊鴉仁又率兵繼至既而鄱陽世嗣末安侯曠羊鴉仁李廷任樊文皎率衆渡淮攻賊東府城前柵破之遂結營于青溪水東景遣其儀同宋子仙頰南平王第緣水西立柵相拒景食稍盡至是米斛數十萬人相食者十五六初援兵北岸百姓扶老携幼

以侯王師終得過淮便競剽掠賊黨有欲自拔者聞之咸止邵陵攜王綸子確爲太子舍人鍾山之役若戰所向披靡及侯景乞盟憚確在外慮爲後患故求召確入城詔乃召確爲南中郎將廣州刺史確知此盟多貳城必淪沒因欲南奔攜王聞之逼確使入確猶不肯攜王流涕謂曰汝欲反邪時臺使周石珍在坐確謂石珍曰侯景雖云欲去而不解長圍以意而推其事可見今召我入未見益也石珍曰勅旨如此侯豈得辭確執意猶堅攜王大怒謂趙伯超曰譙州鄉爲我斬之當齎首赴闕伯超揮刃盼曰我識君耳

刀豈識君確於是流涕而出遂入城及景背盟復圍城城陷確排闥而入啓高祖曰城已陷矣高祖曰猶可一戰不對曰不可臣向親格戰勢不能禁自縊下城僅得至此高祖歎曰自我得之自我失之亦復何恨乃使確爲慰勞文確既出見景景愛其膂力嘗令在左右先是攜王遣人密導確確出謂使者曰侯景輕佻可一夫力致確不惜死正欲手刃之但未得其便耳鄉還啓家王願勿以爲念也事未遂而爲賊所害山桑侯會理南康簡王績之子太清二年侯景圍京邑會治嚴將入援會北徐州刺史封山侯正表將應

其兄正德外託赴援實謀襲廣陵會理擊破之方得
進路臺城隔侯景遣前臨江太守董紹先以高祖手
勅召會理其僚佐咸勸距之會理曰諸君心事與我
不同天子年尊受制賊虜今有手勅召我入朝臣子
之心豈得違背且遠處江北功業難成不若身赴京
都圖之肘腋吾計決矣遂席卷而行以誠輸紹先至
京景以爲侍中司空兼尚書令雖在寇手每思興復
與西鄉侯歡等布心腹要結壯士時范陽祖皓斬董
紹先據廣陵城起義期于會理爲內應皓敗狀辭相
連及景矯詔免會理官猶以白衣領尚書令是冬景

往晉熙京師虛弱會理復與柳敬禮謀之曰舉大事
必有所資今無寸兵安可以動會理曰湖熟有吾舊
兵三千餘人昨來相知尅期響集聽吾日定便至京
師計賊守兵不過千人耳若大兵外攻吾等內應立
取王偉事必有成縱景後歸無能爲也敬禮曰善因
贊成之于時百姓厭賊咸思用命自丹陽至于京口
靡不同之後事不果與建安侯通理並遇害
建安侯通理南康簡王績之次子也太清中侯景內
寇聚賓客數百輕裝赴南兖州隨兄會理入援嘗親
當矢石爲士卒先及城陷又隨會理還廣陵因入齊

爲質乞師行日會侯景遣董紹先據廣陵遂追會理因爲所獲紹先防之甚嚴不得與兄弟相見乃僞請光還京得人辭毋謂其姊安固公主曰事既如此豈可合家受斃兄若至願爲言之善爲計自免勿賜以爲念也家國阨危雖死非恨前途亦思立效未知天命如何耳至京以魏降大元貞立節忠正可以託孤乃以玉柄扇贈之貞怪其故不受通理曰後當見憶幸勿推辭會祖皓起兵通理奔長蘆收軍得千餘人其左右有應賊者因聞劫會理其衆遂駭散爲景所害時年二十一元貞始悟其前意往收葬焉

瀏陽公大雅簡文公之子也太清三年京城陷賊已乘城大雅猶命左右格戰賊至漸衆乃自縊而下因發憤感疾薨時年十七忠壯世子方等少聰敏有俊才初高祖欲見諸王長子世祖遣方等入侍方等欣然升舟免憂辱行至繇水值侯景亂世祖召之方等啓曰昔申生不愛其死方等豈顧其生世祖省書歎息知無還意乃配步騎一萬使援京都賊每來攻方等必身當矢石宮城陷方等歸荊州收集士馬甚得衆和世祖始歎其能方等又勸修築城柵以備不虞既成樓雉相望周回七十餘里世祖觀之甚悅河

東王爲湘州刺史不受都府之令方等乃乞征之世祖許焉拜爲都督令帥精卒二萬南討方等臨行謂所親曰吾此段出征必死無二死而獲所吾豈愛生及至麻河溪河東王率軍逆戰方等擊之軍敗遂溺死時年二十二

宜豐侯脩爲梁秦二州刺史時兄嗣鄱陽王範在湓城頗有異論武陵王大生疑防流言噂啗脩深自分釋求送質子并請助防武陵王乃遣從事中郎蕭固諮以當世之事且觀脩意脩涕泣爲言忠臣孝子之節王敬納之故終修之時不爲不義一夕忽有狗據

脩所卧床而卧脩曰此其戎乎因大脩城壘承聖元年魏將達奚武來攻脩遣記室參軍劉璠至益州求救於武陵王紀紀遣將楊乾運援之拜脩隋郡王璠還至嶓嶮乃降于魏乾運班師璠至城下說城中降魏脩數之曰卿不能死節反爲說客邪命射之聞信遣至荊州元帝遣與相聞脩遣諮議虞馨致武牛酒武謂曰梁已爲侯景所敗王何爲守此孤城修荅守之以死誓爲斷頭將軍

陳長沙王叔堅始興王叔陵弟也宣帝弗豫叔堅陵等並從後主侍疾叔陵陰有異志乃命典藥吏口切

藥刀甚銳可礪之及宣帝不諱倉卒之際又命其左右於外取劍左右弗悟乃取朝所服佩木劍以進叔陵怒叔堅在側聞之疑有變伺其所爲及翌日小歛叔陵哀剉藥刀進斫後主中項後主乳母樂安吳俱以身捍之獲免叔堅自後扼叔陵擒之并奪其刀將殺之間後主曰即盡之爲待也後主不能對叔陵舊多力湏臾奮得脫出雲龍門入於東府城兵敗走趨新林蕭摩訶追斬之

岳陽王叔慎禎明元年出爲持節都督湘衡桂武四州諸軍事智武將軍湘州刺史三年隋師濟江破臺

城前刺史晉熙王叔文巴州刺史畢寶荊州刺史陳紀並降隋行軍元帥清河公楊素兵下荆門別遣其將龐暉將兵略地南至湘州城內將士莫有固志克日請降叔慎乃置酒會文武僚吏酒酣叔慎歎曰君臣之義盡於此乎長史謝基伏而流涕湘州助防遂興侯正理在坐乃起曰主辱臣死諸君獨非陳國之臣乎今天下有難寔是致命之秋也縱其無成猶見臣節青門之外有死不能今日之機不可猶豫後應者斬衆咸許諾乃殺牲結盟仍遣入許奉降書於龐暉信之克期而入叔慎伏甲待之暉令數百人屯於

城門自將左右數十人入于廳事俄而仗兵發縛暉之以徇盡擒其黨皆斬之叔慎坐於射堂招合士衆數日之中兵至五千人衡陽太守樊通武州太守鄔君業皆請赴難未至隋遣中牟公薛胄爲湖州刺史聞麗暉死乃益兵隋又遣行軍總管劉仁思救之未至薛胄兵次鵝羊山叔慎遣正理及樊通拒之因大合戰自旦至于日昃隋軍迭息而正理兵少不敵於是大敗胄乘勝入城生擒叔慎是時鄔君業率其衆自武州來赴出橫橋江聞叔慎敗績乃頓于新康口隋總管劉仁思兵亦至橫橋據水置營相持信宿因

合戰君業又敗仁思虜叔慎正理君業及其黨與十餘人秦王斬之于漢口叔慎時年十八

冊府元龜卷終

册府元龜

淮南李嗣京叅閱

西極文翔鳳訂正

豫章黃國琦較釋

宗室部 二十五

忠第二

後魏高涼王孤平文皇帝之第四子也烈帝顧命迎立昭成群臣咸以新有大故宜立長君大人梁蓋等共推孤孤不肯乃自詣鄴奉迎請身留為質石季龍義而從之昭成王即位乃分國半部以與之

册府元龜

宗室部

卷之三百八十五

上谷公紇羅神元皇帝之曾孫也初從道武自孤獨
 如賀蘭部與弟建勸賀蘭訥推道武為王
 文安公泥國之踈族也性忠直道武厚遇之元城侯
 屈子磨渾少為明元所知元紹之逆也明元潛隱於
 外磨渾與叔孫詐云明元所在紹使帳下二人隨磨
 渾往窺為逆磨渾既得出便縛帳下詣明元斬之帝
 得磨渾大喜為羽翼以勲賜爵長沙公拜尚書
 陰平王烈剛武有智略元紹之逆百僚莫敢有聲惟
 烈行出外詐附紹募執明元紹信之自延秋門出遂
 迎立明元以功進爵陰平王

武遂子拔于遼西公意烈子道武以宗親委之心腹
 屢效忠勤明元踐祚賜爵武遂子

順陽王郁桓帝之後也少惠正允直文成時位殿中
 尚書賜爵順陽公文成末乙渾專權郁從順德門入
 欲誅渾渾窘怖遂奉獻文臨朝後謀殺渾為渾所誅
 獻文錄郁忠正追贈順陽王謚曰簡

南平公目辰桓帝之後也乙渾謀亂目辰與順陽王
 郁謀殺之事發逃免獻文傳位以有定策功進爵為
 王

東陽公丕烈帝之孫也乙渾謀反丕以奏聞詔收渾

誅之

河間公齊烈帝之玄孫也少雄傑魁岸太武征赫連昌大武馬蹶賊逼帝齊以身蔽拒决死力戰賊乃退帝得上馬是日微齊帝幾至危殆帝以微服入其城齊固諫不許乃與數人從帝入城內既覺諸門悉閉帝及齊等因入其宮中得婦人裾繫之槩上帝乘而上因此得拔於難齊有力焉賜爵浮陽侯任城王禎性忠謹孝文徵赴講武引見戒之曰每欽忠懿思一言展故因講武遠徵赴闕

建中伯志河間王齊之孫爲給事申郎孝文南征徵

服觀戰所有箭欲犯帝志以身障之帝便得免矢中志目因此一目喪明以志行嘗州事

安樂王長樂子詮爲定州刺史及京兆王愉之反詐言國變在北州鎮咸疑朝廷有疊遣使觀詮動靜詮具以狀告州鎮帖然愉奔信都詮與李平高殖等四面攻燒愉突門而出尋除侍中兼以告首之功除尚書左僕射

彭城王勰孝文時爲尚書監侍中正中軍大將軍開府勰表以一歲國秩職俸親恤以禪軍國詔曰割身存國理爲遠矣但汝以親乃減已助國職俸便停親

國二事聽三分受一孝文不豫勰內侍醫藥外總軍國之務遐邁肅然人無異議徐謩當世之上醫也先是假還雒陽及召至勰引之別所泣涕執手而謂之曰君今世元化至尊氣力危憊願君竭心善思方治若聖體日康令四海有賴當獲意外之賞不然便有不測之誅非但榮辱乃存亡由此君其勉之左右見者莫不嗚咽及引入寤便欲進治勰以孝文神力虛弱惟令以食味消息勰乃密爲壇於汝水之濱依周公故事告天地顯祖請命乞以身代孝文日有瘳後自懸瓠幸鄴勰嘗侍坐輿輦晝夜不離於側飲食必

嘗之而後手自進御從孝文征沔北還以功爲司徒太子太傅侍中如故俄而蕭寶卷將陳顯達內寇孝文復親討之詔勰使持節都督中外諸軍事總攝六師是時孝文不豫勰辭曰臣侍疾無暇六軍須有所託事不兩興情力又竭更請一王總當軍要孝文曰治戎侍疾皆憑於汝牽病如此吾深慮不濟安六軍保社稷者捨汝而誰何容更請人以違心寄宗祏所賴惟在於汝諸葛孔明異姓受託而况汝乎行次滎陽孝文謂勰曰吾患轉惡汝其努力車駕至馬圈去賊營數里顯達等出戰諸將大破之勰部分諸將攻

賊壘其夜奔追孝文疾甚謂勰曰脩短命也死生大分今吾氣力危懼當成不濟矣雖敗顯達國家安危在此一舉社稷所仗惟在汝身霍子孟以異姓受付况汝親賢可不勉也勰泣曰士於布衣猶爲知己盡命况臣託靈先皇聯暉陛下誠應竭股肱之力加以忠貞但臣出入喉旂每跨時要及於寵靈輝赫聞之遐邇弗參宰臣機政畢歸震主之聲夙忌必矣此乃周旦遁逃成王疑惑陛下愛臣便爲未盡始終之美非所以惡華捐勢非所以辭勤請逸正希仰成陛下日鏡之明下念愚臣忘退之禍孝文久之曰吾尋

思汝言理實難奪乃手詔宣武曰汝第六叔勰清規
楙賞與白雲俱潔厭榮捨綬以松竹爲心吾少與綢
繆提攜道趣每請解朝纓恬真兵整吾以長兄之重
未忍離邊何容仍屈素業長嬰世網吾百年之後其
聽勰辭蟬捨冕遂其冲挹之性也使成王之明讎從
爾舉不亦善乎汝爲孝子勿違吾勅及孝文不起于
行宮遇秘喪事獨與右僕射任成王澄及入如平嘗
視疾進膳可决外奏累日達宛城乃夜進安車於郡
廳事得加歛禭還載卧輿六軍內外莫有知者遣中
書舍人張儒奉詔徵宣武會駕梓宮至魯陽乃發喪

行服宣武即位勰跪授孝文遺勅數紙咸陽王禧疑
勰爲變停在魯陽郡外久之乃入謂勰曰汝非但辛
勤亦危險至極勰恨之對曰兄識高年長故知有夷
險彥和握蛇騎虎不覺艱難禧曰汝恨吾後至耳自
孝文不豫勰嘗居中親侍醫藥夙夜不離左右至於
衣冠不解亂首垢面帝患多忿因之以遷怒勰每被
誚詈言至厲切威責近侍動將誅斬勰承顏悉心多
所規濟及孝文昇遐陳顯達奔遁始爾慮凶問洩漏
致有逼迫勰內雖悲慟外示吉容出入俯仰神貌無
異及至魯陽也東官官屬多疑勰有異志竊懷防懼

而勰推誠盡禮卒無纖芥宣武立類幸勰第及京兆
廣平暴虐不法詔宿衛隊主率羽林虎賁幽守諸王
於其第勰上表切諫宣武不納勰既無山水之遁又
絕知己之遊雖對妻子鬱鬱不樂

清河王懌宣武初爲尚書僕射時司空高澄以帝舅
寵任既擅威權謀去良宗屢譖懌及京兆王愉等愉
不勝其忿怒遂舉逆冀州肇因愉之逆又構殺彭城
王勰懌恐不免肇又錄囚徒以立私惠懌因侍宴酒
酣乃謂肇曰天子兄弟詎有幾而炎炎不息昔王莽
頭禿亦藉涓陽之資遂篡漢室今君曲形見矣恐復

終成亂階又言於宣武曰臣聞惟器與名不可以假人是故季氏旅岱宣尼以爲深譏仲叔軒懸丘明以爲至誠諒以天尊地卑君臣道別宜杜漸防微無相僭越至城膳錄囚人君之事今乃司徒行之詎是人臣之義且陛下脩政斷獄訟則時雨可降玉燭知和何使明君失之於上好臣竊之於下長亂之基於此在矣宣武咲不應後靈太后委以朝政懌竭力佐輔以天下爲已任領軍元乂太后之妹夫懌裁之以法又所疾乂黨人通直郎宗愛希乂旨告懌謀反禁懌門下詳問左右及朝貴分明得雪懌以忠而獲謗乃

鳩集昔忠烈之士爲顯忠錄二十卷以見意焉

陽平王新成長子願爲懷朔大將軍都督後除朔州刺史及掌州刺史穆泰謀反遣使推願爲主願密以狀聞泰等伏誅帝甚嘉之

冀州刺史元麗子顯和爲徐州安東府長史刺史元法僧叛顯和與戰被擒執手命與連坐顯和曰顯和與阿翁同源別派皆是盤石之宗一朝以地外叛若遇董狐能無慙德遂不肯坐法僧猶欲慰喻顯和曰乃可死作惡鬼不能生爲叛臣及將殺之神色自若建義初贈秦州刺史

彭城王勰子劼善武藝少有氣節孝明初梁武遣將
 犯邊劼上表曰僞豎遊魂闕覩邊境勞兵兼時日有
 千金之費臣仰藉先資紹饗厚秩思以埃塵用禪山
 海臣國封徐州去軍差近謹奏粟九千斛資絹六百
 疋國吏二百人以充軍用靈太后嘉其志意而不許
 之起家爲宗正少卿
 中山獻武王子熙延昌中出爲湘州刺史聞劉騰元
 父隔絕二宮矯詔殺清河王懌熙乃起兵上表云元
 父悖逆如此孰可忍之臣忝籍枝萼思盡力命碎首
 屠肝耳之若薺今輒舉義兵實甲八萬大徒既進文

武爭先與并州刺史陽城王徽嘗州刺史廣陽王淵
 徐州刺史齊王蕭寶寅等俱發庶仰憑祖宗之靈俯
 罄義夫之命掃翦克醜更清京邑臣親總三軍星邁
 赴難置兵温城伏聽天旨熙兵起甫十日爲其長史
 柳元章等所執遇害靈太后反正贈使持節都督冀
 定瀛相幽五州諸軍事大將軍太尉公謚曰文莊王
 臨淮王昌弟孚爲尚書右丞靈太后臨朝宦者干政
 孚乃總括古今名妃賢后凡爲四十卷奏之遷冀州
 刺史爲葛榮所執榮卒還冀州刺史元顥入雒授孚
 東道行臺彭城郡王孚封顥逆書送朝廷天子嘉之



顯平封孚萬年鄉男

東阿侯忻之清河王紹之孫性粗武有力孝莊帝之

圖爾朱榮元天穆也忻之密啓臨事之日乞得侍立

手斬二人及榮之死百寮入賀

青州刺史昂暹爲南兗州刺史元顥入雒暹據州不

屈莊帝還官封汝陽王

比齊趙郡王琛高祖之弟也少時便弓馬有志氣高

祖既輔天子以魏後廢帝中興初授琛散騎嘗侍鎮

西將軍既居禁衛恭勤慎密率王左右

彭城景思王浹爲大師錄尚書自武成帝車駕巡幸

浹嘗留鄴河清二年三月群盜曰

姓也

子禮等數十人

謀劫浹爲主詐稱使者徑向浹第至內室稱勅牽浹

上馬臨以白刃欲引向南殿浹大呼不從遂遇害朝

野痛惜焉

任城王潛爲瀛州刺史後主時奔鄴加潛大丞相及

安德王加尊號於晉陽使劉子昂脩啓於潛至尊出

奔宗廟既重群公勸迫權主號令事寧終歸叔父潛

曰我人臣何容受此啓執子昂送鄴帝至濟州禪位

潛啓竟不達潛與廣寧王孝珩於冀州召募得四萬

餘人拒周軍周齊王憲來伐先遣送書并赦詔潛並

沉諸井戰敗潜孝珩俱被擒憲曰任城王何苦至此
潜曰下官神武帝子兄弟十五人幸而獨存逢宗社
顛覆今日得死無愧墳陵憲壯之歸其妻子將至鄴
城潜馬上哭自投于地流血滿面至長安尋蓬首垢
面長齋不言笑而終妻乃爲尼

廣寧王孝珩文襄第二子也承光

後主年號

即位以孝珩

爲太宰與呼延族莫多婁敬顯尉相願同謀期正月
五日孝珩千秋門斬高阿那肱相願在內以楚兵應
之族與敬顯自遊豫園勒兵出既而阿那肱從別宅
取便路入官事不果乃求出拒西軍謂阿那肱韓長

鸞陳德信等云朝廷不賜遣擊賊豈不畏孝珩反耶
孝珩破宇文邕遂至長安反時何與國家事以今日
之急猶作如此猜高韓恐其變出孝珩爲滄州刺史
至州以五千人會任城王於信都共爲興復之計周
齊王憲來伐兵弱不能敵怒曰繇高阿肱小人吾道
窮矣齊叛臣乞扶令和稍刺孝珩墜馬奴白澤以身
扞之孝珩傷劇遂見虜齊王憲問孝珩自陳國難辭
淚俱下俯仰有節憲爲之改容親爲洗瘡傳藥禮遇
甚厚孝珩獨歎曰嗣君無獨見之明宰相非柱石之
寄恨不得握兵符受廟筭展我心力耳至長安依例

授開府縣侯周武帝在雲陽宴齊君臣自彈胡琵琶命孝珩吹笛辭曰亡國之音不足聽也固命之舉笛裁至口淚下嗚咽武帝乃止

范陽王紹義文宣第三子也後主奔鄴以紹義為尚書令定州刺史周武帝尅并州以封輔相為北朔州總管此地齊之重鎮諸勇士多聚焉前卒長趙穆司馬王當萬等謀執輔相迎任城王於瀛州事不果迎紹義至馬邑輔相及其屬朝阿各奴等數十人皆齊叛臣自肆州以北城戍二百八十餘盡從輔相及紹義至皆反焉紹義與靈州刺史袁洪引兵南出欲取

并州新興而肆州已為周守前隊二儀同以所部降周周兵擊顯州執刺史陸瓊又攻陷諸城紹義還保北朔州將宇文神舉軍逼馬邑紹義遣杜明達拒之兵大敗紹義曰有死而已不能降人遂奔突厥衆三千義令之曰欲還者任意於是哭拜別者大半襄城王亮值後主敗奔鄴亮從焉遷兼太尉太傅周師入鄴亮於啓夏門拒守諸軍皆不戰而敗周軍於諸城門皆入亮方退走亮入太廟行馬內慟哭拜辭然後為周軍所執

安德王延宗後主平陽之敗後主將奔晉陽延宗言

大家但在營莫動以兵馬付臣臣能破之帝不納及至并州又聞周軍已入馳鼠谷乃以延宗為相國并州刺史總山西兵事謂曰并州阿兄取兒今去也延宗曰陛下為社稷莫動臣為陛下出死力戰駱提姿曰至尊計已成王不得輒沮後主竟奔鄴後周邵惠公顥德皇帝與衛可孤戰於武州臨陣墜馬顥奔救擊殺數十人賊衆披靡德皇帝太祖父也乃得上馬引去顥遂戰沒保定初追贈太師趙王招率奴從高祖東征東夏底定招出就國宣帝不豫徵招及陳越代滕五王赴闕比招等至而隋文

帝輔政加招等殊禮入朝不趨劍履上殿隋文帝將遷周鼎招密欲圖之以扶社稷乃招文帝至第飲於寢室招子員貫及妃弟曾封所親人史胄皆先在左右佩刀而立又藏兵刃於帷席之間後院亦伏壯士文帝從者多在閣外惟楊弘元胄弟威及陶徽坐戶側招屢以佩刀割爪啗隋文隋文未之疑元胄覺變扣刀而入招乃以大觴親飲胄酒又命胄向厨取漿胄不為之動滕王道後至隋文降階迎胄因得耳語曰形勢大異公宜速出隋文共道就坐須臾辭出後事覺隋以謀反誅之并其子弟



齊王憲太宗第五子高祖之世爲晉國公護所委任天和已後護欲有所陳多令憲開其間或有可否憲慮主相嫌隙每曲而暢之高祖亦悉此心故護誅憲得無患開府裴文舉憲之侍讀高祖嘗御內殿引見之謂曰晉公不臣之迹朝野所知朕所以泣而誅者安國家利百姓耳昔魏末不綱太祖佐輔元氏有周受命晉公復執威權積習生掌謂法應湏爾豈有三十年天子而可爲人所制乎且近代以來又有以弊變經隸屬便即禮若君臣此乃亂臣之權宜非經國之治術詩云夙夜匪懈以事一人一人者本據天子

爾雖陪侍齊公不得即同臣主且太祖十子寧可盡爲天子卿宜規以正道勸以義方輯睦我君臣協和我骨肉無令兄弟自致嫌疑文舉拜謝而出歸以白憲憲指心撫几曰吾之宿心公寧不悉但當盡忠竭節耳知復何言高祖將欲東封獨與內史王誼謀之餘人莫知後以諸弟才略無出於憲右遂告之憲即贊成其事及大將軍出憲表上私財以助軍食曰臣聞撫機適運理藉時來兼弱攻昧事資權道伏惟陛下繼明作聖闡業弘風思順天心用恢武略方使長蛇外翦宇宙大同軍民內向車書混一竊以龍旗雷

動天網雲布芻粟糧餼或須周給昔邊隅未靜卜衣
願上家財江湖不澄衛茲請獻私粟臣雖不敏敢忘
景行謹上金寶等一十六件少助軍資詔不納而以
憲表示公卿曰人臣當如此朕但愧其心耳寧須物
乎乃詔憲率衆二萬爲前軍趣黎陽高祖親圍河陰
未克憲攻拔武齊進圍維口拔其東西二城以高祖
疾班師是歲初置上柱國官以憲爲之

襲安化縣公孝伯其生與武帝同日又與武帝同學
帝即位引置左右孝伯竭心盡力無所迴避至於時
政得失外間細事皆以奏聞宣帝即位授小冢宰帝

忌齊王憲意欲除之謂孝伯曰公能圖之當以其官
位相授孝伯叩頭曰齊王戚近功高棟樑所寄臣若
順旨則臣爲不忠陛下非孝子也帝因踈之

隋觀德王雄高祖族子也周太象中進爵邢國公高
祖爲丞相雍州牧畢王賢謀作難雄時爲別駕知其
謀以告高祖賢伏誅

河間王弘高祖從祖弟高祖爲丞相嘗置左右委心
腹高祖詰周趙王宅將及於難弘時立於戶外以衛
高祖

唐宋王成器睿宗長子景雲二年以晉州刺史蕭志

忠爲秘書監同州刺史崔湜爲中書侍郎時太平公主謂成器曰待崔湜蕭志忠到當輔政廢太子以爾代之成器馳告皇太子太子與成器奏之故令停湜等官

舒王誼本代宗子昭靖太子邈之子德宗命爲已子建中四年涇原兵亂誼奉德宗出幸奉天賊之攻城誼晝夜傳詔慰勞諸軍不解帶者月餘

後唐贈太保從璟明宗長子明宗在魏府爲軍士所逼莊宗詔從璟謂曰爾父於國有大功忠孝之心朕自明信今爲亂兵所劫爾宜自去宣朕旨無令有疑

從璟行至中途爲元行欽所制復與歸維下莊宗改其名名爲繼璟以爲已子命再往從璟固執不行願死於御前以明丹赤從莊宗赴汴州明宗之親舊多策馬而去左右或勸從璟令自脫終無行意尋爲元行欽所殺天成初贈太保

冊府元龜卷終

冊府元龜 宗室部

卷之三百八十一

[Faint bleed-through text from the reverse side of the page]

册府元龜

淮南李嗣京叅閱

西極文翔鳳訂正

豫章黃國琦較釋

宗室部

二十六

忠諫

古人有言曰忠臣雖在畎畝猶不忘君惓惓之義也
矧骨肉之親本根攸庇若乃朝政有闕君道或愆賞
罰無章衆言並用而能諫之以德竭其誠心務進謹
言期於開悟盖情兼家國義在君親者也與夫信而

後諫不聽則去者異矣詩曰雖有他人不如我同姓其是之謂歟

殷王子比干紂之親戚也見箕子諫不聽而為奴則

曰君有過而不以死爭則百姓何辜乃直言諫紂紂

怒曰吾聞聖人之心有七竅信有諸乎乃遂殺夫王

子比干剗視其心

紂作炮烙之刑王子比干曰王暴

士也見過則諫不用則死忠之至也

遂進諫三日不去朝紂因而殺之

秦公子扶蘇始皇長子始皇益發謫徙邊扶蘇諫曰

天下初定遠方黔首未集諸生皆誦法孔子今上皆

重法繩之臣恐天下不安惟上察之始皇怒使扶蘇

北監蒙恬於上郡

子嬰二世兄子二世時趙高親近日夜毀惡蒙氏求

其罪過舉劾之子嬰進諫曰臣聞故趙王遷殺其良

臣李牧而用顏聚燕王喜陰用荊軻之謀而背秦之

約齊王建殺其故世忠臣而用后勝之議此三君者

皆各以變古者失其國而殃及其身今蒙氏秦之大

臣謀士也而主欲一旦棄去之臣竊以為不可臣聞

輕慮者不可以治國獨智者不可以存君誅殺忠臣

而立無節行之人是內使群臣不相信而外使鬪士

之意離也臣竊以為不可二世不聽

漢淮南王安厲王長子也武帝建元六年閩越復舉兵擊南越南越守天子約不敢擅發兵而上書以聞帝多其義大為發兵遣兩將軍將兵誅閩越安上書諫曰陛下臨天下布德施惠緩刑罰薄賦歛哀鰥寡恤孤獨養耆老賑匱乏盛德上隆和澤下洽近者親附遠者懷德天下攝然攝安也人安其生自以沒身不見兵革今聞有司舉兵將以誅越臣安竊為陛下重之越方外之地勸髮文身之民勸古剪字不可以冠帶之國法度理也自三代之盛胡越不與受正朔與讀曰豫非疆不能服威弗能制也以為不居之地不牧之民

不足以煩中國也故古者封內甸服封內謂封所千里之內也甸服

主治王田以供祭祀也封外侯服封外千里之外也侯也王者斥埃侯衛賓服

侯服之外又有衛服賓賓見於王也侯衛二服同為賓也蠻夷要服要以遙切言以文德求之

耳戎狄荒服此在九州之外者也荒言其荒忽絕遠來夫無嘗者也遠近勢異

也自漢初定已來七十二年吳越人相攻擊者不可勝數然天子未嘗舉兵而入其地也臣聞越非有城

郭邑里也處谿谷之間篁竹之中竹田曰篁習於水鬪便

於用舟地深昧而多水險中國之人不知其勢阻而

入其地雖百不當其一得其地不可郡縣也攻之不

可暴取也以地圖察其山川要塞相去不過寸數而



間獨數百千里間中間也或八九百或千里也阻險林叢弗能盡著

視之若易行之甚難天下賴宗廟之靈方內大寧戴

白之老不見兵革民得夫婦相守父子相保陛下之

德也越人名爲藩臣貢酌之奉不輸大內言其國僻遠於宗廟

之貢祭皆不與也大內都內也國家寶藏也治粟官屬有都內令丞也一卒之用不給

上事自相攻擊而陛下發兵救之是反以中國勞蠻

夷也且越人愚戇輕薄負約反覆其不用天子之法

度非一日之積也一不奉詔舉兵誅之臣恐後兵革

無時得息也間者數年歲比不登民待賣爵贅子以

接衣食贅子者謂令子出就婦家爲贅婿耳賴陛下德澤賑救之得毋

轉死溝壑四年不登五年復蝗民生未復今發兵行

數千里資衣糧入越地輿輻而踰嶺輻今竹輿車也言以輻過嶺耳

柁舟而入水行數百千里夾以深林叢竹水道上下

擊石林中多蝮蛇猛獸夏月暑時嘔泄霍亂之病相

隨屬也曾未施兵接刃死傷者必衆矣前時南海王

反陛下先臣使將軍間忌將兵擊之先臣淮南厲王長間忌人姓名

以其軍降處之上淦後復反會天暑多雨樓船卒水

居擊櫂未戰而疾死者過半親老涕泣孤子號號破

家散業迎尸千里之外裹骸骨而歸悲哀之氣數年

不息長老至今以爲記曾未入其地而禍已至此臣



聞軍旅之後必有凶年言民之各以其愁苦之氣薄陰陽之和感天地之精而災氣爲之生也陛下德配天地明象日月恩至禽獸澤及草木一人有饑寒不終其天年而死者爲之悽愴於心今方內無狗吠之警而使陛下甲卒死亡暴露中原霑潰山谷邊境之民爲之早閉晏開龜字朝不及夕臣安竊爲陛下重之不習南方地形者多以越爲人衆兵彊能難邊城淮南全國之時多爲邊吏全國謂未分爲三之時也淮南人於邊爲吏與越相境故知其地形臣竊聞之與中國異限以高山人迹所絕車道不通天地所以隔外內也其入中國必下領水領水

之山峭峻漂石破舟不可以大船載食糧下也越人欲爲變必先繇餘干界中越邑今鄱陽縣也積食糧迺入伐材治船邊城守候誠謹越人有入伐材者輒收捕焚其積聚雖百越奈邊城何且越人繇力薄材繇弱也不能陸戰又無車騎弓弩之用然而不可入者以保地險中國之人不能其水土也臣聞越甲卒不下數十萬所以入之五倍迺足輓車奉饗者不在其中饗亦餉也南方暑濕近夏瘴熱瘴黃病也暴露水居蝮蛇蠱毒也生疾疾多作兵未血刃而病死者什二三雖舉越國而虜之不足以償所亡臣聞道路言閩越王弟甲弑而殺

之甲者閩王弟名甲已誅死其民未有所屬陛下若欲來內

處之中國使重臣臨存施德垂賞以招致之此必攜

幼扶老以歸聖德若陛下無所用之則繼其絕世存

其亡國建其王侯以為畜越畜養之也此必委質為藩臣

世共貢職陛下以方寸之印丈二之組填撫方外組者

綬印之不勞一卒不頓一戟而威德並行今以兵入其

地此必震恐以有司為欲屠滅之也必雉兔逃入山

林險阻如雉兔之逃竄而入山林險阻之中背而去之則復相群聚留

而守之歷歲經年則士卒罷勸食糧乏絕男子不得

耕稼樹種婦人不得紡績織維丁壯從軍老弱轉餉

居者無食行者無糧民苦兵事逃亡者必眾隨而誅

之不可勝盡盜賊必起臣聞長老言秦之時嘗使尉

屠睢擊越郡都尉姓屠名睢也又使監祿鑿渠通道監郡御史也名祿

越人逃入深山林叢不可得攻留軍屯守空地曠日

引久士卒勞倦越出擊之秦兵大破廼發適戍以備

之當此之時外內騷動百姓靡敝靡敝也音縻行者不還

往者莫反皆不聊生亡逃相從群為盜賊於是山東

之難始興此老子所謂師之所處荆棘生之者也凶

事一方有急四面皆從臣恐變故之生奸邪之作繇

此始也周易曰高宗伐鬼方三年而克之鬼方小蠻

夷高宗殷之盛天子也以盛天子伐小蠻夷三年而後克言用兵不可不重也臣聞天子之兵有征而無戰言莫敢較也如使越人蒙微幸以逆執事之顏行顏行猶鴈行在前行故曰顏行胡郎切斷輿之卒有一不備而歸者雖得越王之首臣竊為大漢羞之陛下以四海為境九州為家八藪為囿江漢為池生民之屬皆為臣妾人徒之衆足以奉千官之共租稅之收足以給乘輿之御而玩心神明秉執聖道負黼依依形如屏風而曲之畫以黼文張於牖間依讀憑玉几南面而聽斷號令天下四海之內莫不嚮應陛下垂德惠以覆露之露謂之如露潤澤也或露或覆言養

也使元元之民安生樂業則澤被萬世傳之子孫施之無窮天下之安猶泰山而四維之也夷狄之地何足以為一日之間而煩汗馬之勞乎詩云王猶允塞徐方既來言王道甚大而遠方懷之也臣聞之農夫勞而君子養焉愚者言而智者擇焉臣安幸得為陛下守藩以身為鄣蔽人臣之任也邊境有警愛身之死而不畢其愚非忠臣也安竊恐將吏之以十萬之師為一使之任也言漢發一使鎮撫之則越人賓服不煩兵往是時漢兵遂出踰嶺適會閩越王弟餘善殺王以降漢兵罷帝嘉淮南之意



劉向初名更生爲諫議大夫給事中元帝初即位太

傅蕭望之爲前將軍少傅周堪爲諸吏光祿大夫加

也百官公卿表云諸吏所加或皆領尚書事甚見尊

任更生年少於望之堪然二人重之薦更生宗室忠

直明經有行擢爲散騎宗正給事中與待中金敞拾

遺於左右四人同心輔政患苦外戚許史在位放縱

而中書宦官弘恭石顯弄權望之堪更生議欲白罷

退之未白而語泄遂爲許史及恭顯所譖愬堪更生

下獄及望之皆免官其春地震夏客星見昴卷舌間

見於昴與卷舌上感悟下詔賜望之爵闕內侯奉朝請

秋徵堪向欲以爲諫議大夫恭顯白皆爲中郎冬地

復震時恭顯許史子弟侍中諸曹皆側目於望之等

更生懼焉乃使其外親上變事非嘗之事故言竊聞

故前將軍蕭望之等皆中正無私欲致大治忤於貴

戚尚書忤猶逆也今道路人聞望之等復進以爲復見毀

讒必曰嘗有過之臣不宜復用是大不然言不宜用

臣者此臣聞春秋地震爲在位執政大盛也不爲三

獨夫動亦已明矣謂蕭望之周堪及向且往者高皇

帝時季布有罪至於夷滅後赦以爲將軍高后孝文

間卒爲名臣卒終也孝武帝時兒寬有重罪繫按道侯

韓說諫曰

說讀悅

前吾丘壽王死陛下至今恨之恨悔之

今殺寬後將復大恨矣上感其言遂貫寬貫謂緩恕其罪復

用之位至御史大夫御史大夫未有及寬者也又董

仲舒坐私為災異書主父偃取奏之下吏罪至不道

幸蒙不誅復為太中大夫膠東相以老病免歸漢有

所欲興嘗有詔問興謂改作憲章仲舒為世儒宗定議有益

天下孝宣皇帝時夏侯勝坐誹謗繫獄三年免為庶

人宣帝復用勝至長信少府太子太傅名敢直言天

下美之若乃群臣多此比類難一二計有過之臣無

負國家有益天下此四臣者足以觀矣前弘恭奏望

之等獄決三月地大震恭移病出

移病者移書言病一日言以病移出

不居官府後復視事天陰雨雪繇是言之地動殆為恭等

殆近也臣愚以為宜退恭顯以章蔽善之罰章明也進望

之等以通賢者之路如此太平之門開災異之原塞

矣書奏恭顯疑其更生所為白請考姦詐辭果服遂

逮更生繫獄下太傅常玄成諫大夫貢禹與廷尉雜

考劾更生前為九卿坐與望之堪謀排車騎將軍許

氏侍中者毀離親戚欲退去之而獨專權為臣不忠

幸不伏誅復蒙恩徵用不悔前過而教令人言變事

誣罔不道更生坐免為庶人而望之亦坐使子上書

白寃前事恭顯白令詣獄置對置對者立其罪辭望之自殺

天子甚悼恨之乃擢周堪為光祿勳堪弟子張猛光

祿大夫給事中大見信任恭顯憚之數譖焉更生見

堪猛在位幾已得復進幾讀日其懼其傾危乃上封事諫

曰臣前幸得以骨肉備九卿奉法不謹乃復蒙恩竊

見災異並起天地失嘗徵表為國徵證也欲終不言念

忠臣雖在猷猷猶不忘君惓惓之義剛者田中之溝也工大切惓惓

繇中忠義之意况重以骨肉之親又加以舊恩未報乎欲竭

愚誠又恐越職然惟二恩未報也惟思忠臣之義一抒

愚意退就農畝死無所恨抒謂發泄之也臣聞舜命九官禹

司空棄后稷契司徒咎繇作士垂共工濟濟相讓和

之至也衆賢和於朝則萬物和於野故簫韶九成而

鳳凰來儀擊石拊石百獸率舞韶舜樂名舉蕭管之屬示其倫也於韶樂

九奏則鳳凰見其容儀擊鍾鳴磬而百獸相率來舞言感至和也四海之內靡不和

寧及至周文開基西郊言文王始受命作周也雜選衆賢罔不

肅和崇推讓之風以誚分爭之事文王既没周公思

慕歌詠文王之德其詩曰於穆清廟肅雍顯相濟濟

多士周頌祀文王清廟之詩也於嘆辭穆肅敬也雍和也顯明相助也濟濟盛也言文王有清靜之

化敬而且和光明著見故濟濟之衆士皆執行文王之德也於讀曰烏當此之時武王

周公繼政朝臣和於內萬國驩於外故盡得其驩心



以事其先祖其詩曰有來雍雍至止肅肅相維辟公

天子穆穆周頌禘太祖之詩也相助也辟百辟也公諸侯也言有此賓客以和而來至也而敬

耳於是時天子則穆穆然也言四方皆以和來也

諸侯和於下天應報於上故周頌曰降福穰穰此執

篇祀武王之詩又曰貽我麇麇此思文之篇以后稷也穰穰多也貽遺也

言天遺此物也來麇麥也始自天降此皆以和致和貽讀與遺同

獲天助也下至幽厲之際朝廷不和轉相悲怨厲王夷王

之子厲王生宣詩人疾而憂之曰民之無良相怨一

王宣王生幽王此小雅角弓之篇刺幽王之詩也良善也言人各

方為不善其意乖離而相怨也一方謂自守一方所

向異衆小在位而從邪議歛歛相是而背君子故其

詩曰歛歛訛訛亦孔之哀謀之其臧則具是遠謀之

不臧則具是依此小雅小旻篇刺幽王之詩也言在

職各失臣節甚可哀痛謀之善者則背君子獨處守

之不善之謀依而施用所以為刺也正不撓衆枉撓屈也不為衆

曲而自屈也勉強以從王事則反見

憎毒讒愬故其詩曰密勿從事不敢告勞無罪無辜

讒言瞿瞿此小雅十月之交篇刺厲王之詩也密勿

敢自陳勞苦言已實無罪當是之時日月薄蝕而無

辜而被讒愬嗷嗷然也光薄迫也謂其詩曰朔日辛卯日有蝕之亦孔之醜

被掩迫也自此以下至百川沸騰皆十月之交詩也孔甚也醜

惡也周之十月夏之八月朔日有辛卯日月交會而

日見蝕陰傷於陽辛金日也卯木辰又曰彼月而微

也以卯侵金則臣侵君故甚恐也



此日而微今此下民亦孔之哀微虧微也言彼月者當有虧耳而今此日

乃復微也言君臣失道又曰日月鞠凶不用其行四

是為災異故令人哀也鞠告也言日月不用其當行之道以告凶災者繇四方之國無政理

國無政不用其良善人也天變見於上地變動於下水泉沸騰山谷異

處其詩曰百川沸騰山冢峯崩高岸為谷深谷為陵

哀今之人胡惜莫懲沸湧出也騰乘也冢山頂也峯

百川沸騰而相乘陵山頂隆高而盡推壞陵谷易處

尊卑失序災異大矣誠可懼畏哀哉今人何為其莫

創艾也霜降失節不以其時其詩曰正月繁霜我心憂

傷民之訛言亦孔之將言民以是為非甚衆大也正

夏之四月正陽之月謂之正月繁多也訛偽也孔甚

也將大也此言王政外傷也多霜害於生物故以心

為憂傷而衆庶之人共為偽言此皆不和賢不肖易

以是為非排斥賢雋禍甚大也賢人在下不肖居自此之後天下大亂

位之所致也上故云易位也篡殺殃禍並作厲王奔彘厲王無道民不堪命乃與

幽王見殺為犬戎所攻殺至乎平王末年魯隱之始即位也

平王幽王之周大夫祭伯乖離不和出奔於魯隱元年祭

傳曰伯來穀梁而春秋為諱不言來奔傷其禍殃自此始也是

後尹氏世鄉而專恣春秋公羊經隱公二年四月尹

夫其稱尹氏何貶也曷為貶氏卒傳曰尹氏者乃天子之大

詩小雅節南山云尹氏大師赫赫師尹不平謂何刺

也諸侯背畔而不朝周室卑微二百四十二年之間

謂從隱公元年至哀公十四年獲麟也隱公十一年

桓公十八年莊公三十二年閔公二年僖公二十三年



年文公十八年宣公十八年成公十八年襄公三十一年昭公三十二年定公十五年哀公十四年凡二百四十日食三十六
謂隱二月己巳桓三年七月壬辰朔十七年十月朔莊三年十月癸亥朔三十年九月庚午朔僖五年九月戊申朔十五年六月辛丑朔宣八年七月甲子十年二月癸亥朔十七年六月癸未成十六年六月丙寅朔十七年二月丁巳朔襄十四年二月乙未朔十五年秋八月丁巳二十年冬十月丙辰朔二十一年九月庚戌朔冬十月庚辰朔二十三年二月癸酉朔二十四年秋七月甲子朔八月癸巳朔二十七年冬十二月乙亥朔昭七年夏四月甲辰朔十五年六月丁巳朔十七年夏六月甲戌朔二十一年秋七月壬午朔二十二年十二月辛亥朔定五年正月辛亥朔十二年十一月丙寅朔十五年八月庚辰朔凡三十六也
地
震五 謂文九年九月癸酉襄六年五月甲子昭十九年五月己卯二十三年八月乙未哀三年四月

甲午 山陵崩地二 僖十四年八月辛卯沙鹿壞成
凡五 謂文十四年秋十月有星孛入于北斗昭十七年冬有星孛于火辰哀十三年冬十一月有星孛東 夜嘗星不見夜中星隕如雨 事在莊七年方凡三見
火災十四 桓十四年秋八月壬申御廩災莊二十年三年二月甲子新宮災襄九年春宋災三十年五月甲午宋災昭九年夏四月陳災十八年夏五月壬午宋衛陳災定二年夏五月壬辰雉門及兩觀災哀三年五月辛卯桓宮僖宮災四年六月辛丑亳社災凡四 長狄入三國 謂春秋文十一年經書冬十月甲午何長狄也兄弟三人一者之齊一者之魯一者之晉之齊榮如之魯喬如之晉楚如長狄野之種 五石隕墜六鷁退飛多麋有蜮蜚鸚鵡來巢者皆一見

謂僖十六年正月戊申朔隕石于宋丘是月六鷁退飛過宋都莊十六年冬多麋十八年秋有蜮二十九



年秋有蜚昭二十五年夏有鸛鶴來畫冥晦倍十五

巢蛾短尾狐也鷓水鳥也蜚負蟻也事在成十六年正月雨木

已卯晦震夷伯之雨木冰冰者氣著樹木綜為冰也

廟穀梁傳日晦也今俗呼為李梅冬實七月霜降草木不死倍三十三

間樹者隕霜不殺草李梅實未知在何時也而此言李梅冬

實又云七月霜降草木不死與今春秋不同未見義

所八月殺菽謂定公元年十月隕霜殺菽周大雨雹

事在僖二十九年秋及雨雪雷霆失序相乘隱九年

周三年冬四年正月西大雨震電庚辰大雨雪莊六年冬十月雨雪倍五

年冬大雪皆是也雷古之雷字也霆雷之急者也

水旱饑喙螽並起並起猶雜沓也謂桓元年秋大

大水二十五年秋大水宣十年秋大水倍二十一年夏大旱宣

十年秋大旱宣十年冬饒十五年冬喙生饑襄二十

四年冬大饑桓五年秋螽倍十五年八月螽文三年

秋雨螽於宋八年螽宣六年八月螽十三年秋螽十

五年秋螽襄十年八月螽哀十二年十二月螽十三

年九月螽十二月螽惠五年九月螽八年九月螽莊

六年秋螽皆是也螽即螻也蟲之食苗心者也螽音

終螽音當是時禍亂輒應弒君三十六謂隱公四年

冥也完二十五年羽父使賊弒公子為氏桓二年宋督弒

其君與夷七年曲沃伯誘晉小子侯殺之十七年鄭

高渠彌弒昭莊八年齊無知弒其君諸兒十三年宋

萬弒其君捷十四年傳瑕弒其君鄭子三十二年共

仲使圉人犖賊子般閔二年共仲使卜筮賊公子武

闔僖十六年晉里克弒其君卓二十四年晉弒懷公

子高梁文元年楚世子商臣弒其君頤十四年齊公

子商人弒其君舍十六年宋人弒其君杵臼十八年

齊人弒其君商魯襄仲殺子惡莒弒其君慶其宣二

年晉盾弒其君夷臯四年鄭公子歸生弒其君夷十

年陳夏徵舒弒其君平國成十八年晉弒其君州蒲

襄七年鄭子驅使賊弒僖公二十五年齊崔杼弒其

君光二十六年衛喜弒其君剽二十九年闞殺吳子

餘祭三十年蔡世子般弒其君固三十一年莒人弒

宗室部

十四

其君密州昭元年楚公子圍問王疾縊而殺之十三年楚公子比弑其君處子乾緒十九年許世子止弑其君買二十七年吳弑其君餘定十三年薛弑其君比哀四年盜殺蔡侯申六年齊陳乞弑其君荼十年齊人弑悼公 亡國五十二 謂桓五年州公如曹莊四九三十六 年紀侯大去其國十年齊師滅譚十三年齊人滅遂十四年楚子滅息十六年楚滅鄧閔元年晉滅霍滅魏僖五年楚滅弦晉滅虢滅虞十三年楚人滅黃十七年楚滅項十九年秦人取梁二十五年衛侯毀滅邢二十六年楚人滅夔三十年秦滅滑文四年楚滅江五年楚人滅蓼十六年楚人秦人巴人滅庸宣八年楚滅舒蓼九年取根牟十三年楚子滅蕭十五年晉師滅赤狄潞氏成六年取鄆十七年楚滅舒庸襄六年莒人滅鄆齊侯滅萊昭四年楚子滅頓十三年取邾二十五年楚滅舒鳩蠻氏十七年晉滅陸渾戎二十一年晉滅鼓三十三年吳滅徐定安四年蔡滅沈五年楚滅唐六年鄭滅許十四年楚人滅項十五年楚人滅胡哀八年宋公滅曹邾滅須句楚權晉滅焦楊楚滅房甲凡五十二

諸侯奔走不得保其社稷者不可勝數也 謂桓十五年

出奔蔡襄十四年衛侯出奔齊昭三年比燕伯 周室

多禍晉敗其師於貿戎 貿戎地名也公羊成元年秋

之蓋晉伐其郊 郊周邑也昭二十三年 鄭傷桓王 王

諸侯伐鄭伯禦之射 正月經書晉人圍郊也 戎執其使 隱七年冬經書天

王中肩事在桓五年秋 王使凡伯來聘戎


伐凡伯于 五大夫爭權三君更立莫能正 周景王終

文公鞏簡公其平大夫相與爭奪更立王子 單穆公劉

召不往齊逆命而助逆 春秋桓十六年書衛侯朔出

遂至陵夷不能復興 陵夷曰 繇此觀之和氣致祥乖

氣致異祥多者其國安異衆者其國危天地之嘗經



古今之通義也今陛下開三代之業紹文學之士優

游寬容使得並進今賢不肖渾淆言雜亂也白黑不分邪

正雜揉忠讒並進揉和也章交公車人滿北軍漢儀注中壘校尉

尉北軍壘門內尉一人主上書者獄上章於公車尉主有不如法者以付北軍尉比軍尉以法治之也

朝臣舛午繆戾乖刺言志不和各相違背也更相讒愬轉相是

非傳授增加文書紛糾前後錯繆毀譽渾亂言各任私情不

得其所以營惑耳目感移心意不可勝載言其誣罔天子也營

謂四分曹為黨往往群朋曹輩也將同心以陷正臣進

者治之表也正臣陷者亂之機也乘治亂之機未知

孰任而災異數見此臣所以寒心者也夫乘權藉勢

之人子弟鱗集於朝言其相次如魚鱗羽翼陰附者衆輻湊

於前輻湊言如車輻之歸于轂也毀譽將必用以終乖戾之咎言讒

佞之人毀譽得進則忠賢被斥日以乖戾也是以日月無光霜雪夏墮海

水沸出陵谷易處列星失行皆怨氣之所致夫遵衰

周之軌迹適詩人之所刺而欲以成太平致雅頌猶

卻行而求及前人也初元以來六年矣按春秋六年

之中災異未有稠如今者也稠多也夫有春秋之異無

孔子之救猶不解紛况甚於春秋乎原其所以然者

讒邪並進也讒邪之所以並進者繇上多疑心既已

用賢人而行善政如或譖之則賢人退而善政還還謂



叔還也夫執狐疑之心者來讒賊之口持不斷之意者

開群枉之門譏邪進則衆賢退群枉盛則正士消故

易有否泰小人道長君子道消君子道消則政日亂

故爲否否者閉而亂也君子道長小人道消小人道

消則政日治故爲泰泰者通而治也詩又云雨雪瀼

瀼見覘聿消

此小雅角弓篇刺幽王好讒佞之詩也瀼瀼盛也是無雲也覘日氣也聿辭也

言雨雪之盛瀼瀼然至於無雲日氣始出於雨雪皆消釋矣喻小人雖多王若欲與善政則賢者外用而

小人與易同義昔者鯀共工驩兜與舜禹雜處堯朝

滅矣鯀崇伯之名即構杌也共工火皞氏之後
即窮奇也驩兜帝鳩無之後即渾敦也
周公管蔡

並居周位當是時迭進相毀迭互也流言相謗豈可勝

也哉帝堯成王能賢舜禹周公而消共工管蔡故以

大治榮華至今孔子與季孟偕仕於魯

季孟謂季孫孟孫皆桓公

之後代執國權而卑公室也李斯與叔孫俱官於秦叔孫者叔定

公始皇賢季孟李斯而消孔子叔孫故以大亂汚辱

至今故治亂榮辱之端在所信任信任既賢在於堅

固而不移詩云我心匪石不可轉也此即栢舟之詩也言石性雖堅

尚有可移轉曰至貞人執德不傾過於石也言守善篤也易曰渙汗其大

號此易渙汗九五爻也言王者號令如汗汗出而不

及者也今出善令未能踰時而反是反汗也一時三月也

用賢未能三旬而退是轉石也論語曰見不善如探

湯論語載孔子之言探湯言其除難無所避也今二府奏佞調不當在位

歷年而不去也二府丞相御史也調古諂字故出令則如反汗用

賢則如轉石去佞則如拔山如此望陰陽之調不亦

難乎是以群小窺見間隙緣飾文字巧言醜詆詆毀也

流言飛文譁於民間譁誼也故詩云憂心悄悄愠於群

小此即栢舟言仁而不遇之詩悄悄憂貌愠怒也小人成群誠足愠也昔孔

子與顏淵子貢更相稱譽不為朋黨事俱見論語禹稷臯

陶傅相汲引不為比周事具尚書舜典何則忠於為國無邪

心也故賢人在上位則引其類而聚之於朝易曰飛

龍在天大人造也乾卦九五象辭言聖王正位臨在馭萬方則賢人君子皆來朝也

下位則思與其類俱進易曰拔茅連茹以其彙征吉

彙類也茹牽引也茅喻君有潔白之德臣下引其類而仕之此泰卦初九爻征行也在上則引

其類在下則推其類故湯用伊尹不仁者遠而衆賢

至類相致也今佞邪與賢臣並任交戟之內合黨共

謀違善依惡歛歛訛訛數設危險之言欲以傾移主

上如忽然而用之此天地之所以先戒災異之所以

重至也自古明聖未有無誅而治者也故舜有四放

之罰流共工於幽州放驩兜於崇山而孔子有兩觀

之誅少正卯姦人之雄故孔攝司寇七日誅之於兩觀之下兩觀謂闕也然後聖化可

得而行也今以陛下明知誠深思天地之心迹察兩

觀之誅

尋其心迹而察之

覽否泰之卦觀雨雪之詩歷周唐

之所進以為法原秦魯之所消以為戒

歷謂歷觀之原謂思其本

考祥應之福省災異之禍以揆當世之變

省視也揆度也

遠佞邪之黨壞散險詖之聚

險言曰陂

杜閉群枉之門廣

開衆正之路

杜塞也

决斷狐疑分別猶豫使是非炳然

可知則百異消滅而衆祥並致太平之基萬世之利

也臣幸得託肺腑附

舊解云肺腑為肝肺相附著猶言心膂也一說肺為斫木肺禮也自

言于帝室猶

禮附於大材誠見陰陽不調不敢不通所聞竊推春

秋災異以救今事一二條其所以

以繇也

不宜宣泄臣

謹重封昧死上恭顯見其書愈與許史比而怨更生

等成帝即位顯等伏辜更生乃復進用更名向時帝

元舅陽平侯王鳳秉政倚太后專國權數有大異向

見尚書洪範箕子為武王陳五行陰陽休咎之應

休美

也向乃集合上古以來歷春秋六國至秦漢符瑞災

異之記推迹行事連傳禍福著其占驗比類相從各

有條目凡一十篇號曰洪範五行傳論奏之天子心

知向忠精故為鳳兄弟起此論也然終不能奪王氏

權久之營起昌陵數年不成復還歸延陵制度泰奢

向上疏諫曰臣聞易曰安不忘危存不忘亡是以身

安而國家可保也

易下繫之辭

故聖賢之君博觀始終窮

極物情而是非分明王者必通三統二王之後與已為三統天地人

之始也天統謂周十一月建子為上天始施之端也

二曰地統言殷以十二月建丑為下地始化之端也

三曰人統言夏以三月建寅為正人始成之端也

端也言王者象地天人之三統故有三代也命所授者博非獨一姓也孔子論詩至於殷士膚敏

裸將于京此大雅文王篇殷士鄉士也膚美也敏疾也裸也將行也京周京也言殷之臣有

美德而敏疾乃來助祭于周行裸喟然嘆曰喟然大

嗷之事是天命無常歸于有德也哉天命善不可不傳於子孫是以富貴無嘗不如是

則王公其何以戒慎民萌何以勸勉萌與毗同蓋傷無知之貌

微子之事周而痛殷之亡也雖有堯舜之聖不能化

卅朱之子雖有禹湯之德不能訓末孫之桀紂自古

及今未有不亡之國也昔高皇帝既滅秦將都雒陽

感悟劉敬之言自以德不及周而賢於秦遂徙都關

中依周之德因秦之阻世之長短以德為效效謂徵驗也

故嘗戰栗不敢諱亡孔子所謂富貴無嘗蓋謂此也

孝文皇帝居霸陵北臨厠厠近水也霸陵山北頭厠近霸水帝登其上以遠望也

也意悽愴悲懷顧謂群臣曰嗟乎以北山石為椁用

紵絮斲陳漆其間斲斬也陳施也斲絮以漆著其間也故云以北山石為椁紵絮者可以紵

衣絮也斲而陳其間又從而漆之也豈可動哉張

釋之進曰使其中有可欲雖錮南山猶有隙使其中

無可欲雖石椁又何戚焉有可欲謂多藏金玉而厚葬之人皆欲取之是有間

隙也無可欲謂不具器備而薄葬人而無欲攻掘取之故無憂戚也錮謂鑄塞也云錮南山者取其深大喻夫死者無終極而國家有廢興故釋之言為無窮

計也孝文寤焉遂薄葬不起山墳易曰古之葬者厚

衣之以薪藏之中野不封不樹厚衣之以薪言積以覆之也不封謂不聚

土為墳也後世聖人易之以棺槨棺槨之作自黃帝

始黃帝葬於橋山在上郡周陽縣堯葬濟陰丘壠皆小葬具

甚微丘壠冢也舜葬蒼梧二妃不從二妃堯之二女禹葬會稽不

改其烈不改樹木百物之烈也殷湯無葬處謂不見傳記也文武周公

葬于畢畢陌在長安北四十里也秦穆公葬於雍橐泉宮祈平館

下樛里子葬於武庫樛里子秦惠王異母弟也樛里子且死曰葬我必於渭南章臺

東後百年當有天子宮夾我墓又漢興長樂宮在其東未央宮在其西武庫正直其上也皆無丘

壠之處此聖帝明王賢君智士遠覽獨慮無窮之計

也其賢臣孝子承命順意而薄葬之此誠奉安君父

忠孝之至也夫周公武王弟也葬兄甚微孔子葬毋

於防防魯邑名也稱萬古而不墳墓謂壙穴也墳謂積土也曰丘東南

西北之人也不可不識也東西南北言周遊以行其道不得專在本邦故墓須

表為四尺墳遇雨而摧弟子修之以告孔子孔子流

涕曰吾聞之古者不修墓蓋非之也事見禮記延陵季子

適齊而反其子死於羸博之間二邑並在太山其子死於其間穿不

及泉歛以時服封墳掩坎其高可隱謂人立可隱附也而號

曰號謂哭而且言也骨肉歸復於土命也魂氣則無不之也

夫羸博去吳千有餘里季子不歸葬孔子往觀曰延

陵季子於禮合矣事見禮記故仲尼孝子而延陵慈父舜

禹忠臣周公弟弟弟弟者言能順理也其葬君親骨肉皆微薄

矣非苟為儉誠便於體也宋桓司馬為石槨仲尼曰

不如速朽非桓雅為石槨奢泰故激此言秦相呂不韋集知略之士

而造春秋亦言薄葬之義皆明於事情者也逮至吳

王闔閭違禮厚葬十有餘年越人發之及秦惠文武

昭嚴襄五王嚴襄者莊襄則始皇父也皆大作丘壠多其瘞藏瘞埋

咸盡發掘暴露甚足悲也秦始皇帝葬於驪山之阿

阿謂山曲也下錮三泉上崇山墳其高五十餘丈周圍五

里有餘石槨為游館多累石作槨於壙穴中以為離宮別館也人膏為燈

燭水銀為江海黃金為鳧鴈珍寶之藏機械之變機作

械發木之人屬盡其巧變也始皇本紀令匠作機弩矢有所穿近輒射之又言工匠為機咸皆知之已下

閉門皆殺工匠也椁棺之麗宮館之盛不可勝原言不能盡其數本

又多殺宮人生薶工匠計以萬數天下苦其役而反

之驪山之作未成而周章百萬之師至其下矣周章陳勝

將之項籍焚其宮室營宇往者咸見發掘言至其墓所者掘之而求

財其後牧兒亡羊羊入其鑿鑿謂所穿冢藏也牧者持火炤

求羊失火烧其藏椁自古至今葬未有盛如始皇也

數年之間外被項籍之災內罹牧豎之禍罹遭也豈不

哀哉是故德彌厚者葬彌薄知愈深者葬愈微無德

寡知其葬愈厚丘壠彌高宮廟甚麗發掘必速繇是

觀之明暗之效葬之吉凶昭然可見矣周德既衰而

奢侈宣王賢而中興更為儉宮室小寢廟詩人美之

斯干之詩是也詩小雅篇名美宣王考室其首章曰秩秩斯干秩秩流行也干澗也喻宣

之德如澗水源秩秩上章道宮室之如制下章言子

孫之衆多也宮室如制謂桓桓其庭有覺其楹君子攸寧也子孫衆多謂維熊維羆男子之

祥維虺維蛇及魯嚴公即莊公也刻飾宗廟多築臺囿後

嗣再絕謂子般閔公皆殺死也春秋刺焉周室如彼而昌魯秦

如此而絕是則奢儉之得失陛下即位躬親節儉始

營勅陵其制約小天下莫不稱賢明及徙昌陵增塹

為高塹下也積土為山發民墳墓積以萬數營起邑居

期日迫卒卒讀卒也功費大萬大萬億也死者恨於下生

者愁於上怨氣感動陰陽因之饑饉物故流離以十

萬數物故謂死也流謂亡其居處也臣甚愾焉愾謂不了言惑於此事也愾音昏一目愾

古園字憂以死者為有知發人之墓其害多矣若其

無知人安用大安焉也謀之賢知則不說以示衆庶則

苦之說讀曰悅若苟以說愚夫淫侈之人又何為哉

陛下慈仁篤美甚厚聰明疏達蓋世宜弘漢家之德

宗室部

二十三

二十三

二十三

二十三

二十三

二十三

二十三

崇劉氏之美光昭五帝三王而顧與暴秦亂君競為

奢俊比方丘壠顧猶反也說愚夫之目隆一時之觀違賢

知之心亡萬世之安臣竊為陛下羞之唯陛下上覽

明聖皇帝堯舜禹湯文武周公仲尼之制下觀賢知

穆公延陵樛里張釋之之意孝文皇帝去墳薄葬以

儉安神可以為則秦昭始皇增山厚藏以侈生害足

以為戒初陵之撫宜從公卿大臣之議撫音規墓之墓謂規度墓

地也其字從木以息衆庶書奏上甚感向言而不能從其計

向睹俗彌奢淫而趙衛之屬起微賤踰禮制趙皇后昭儀謂

也婕妤向以為王教繇內及外自近者始故採取詩書

所載賢妃貞婦與國顯家可法則及孽嬖亂亡者孽

也嬖愛也序次為列女傳凡八篇以戒天子及採傳記行

事著新序說苑凡五十篇奏之數上疏言得失陳法

戒書數十上以助觀覽補遺闕帝雖不能盡用然內

嘉其言嘗嗟嘆之時帝無繼嗣政繇王氏出災異浸

甚浸又漸也向雅奇陳湯智謀與相親友獨謂湯曰災異

如此而外家日盛其漸必危劉氏吾幸得同姓末屬

累世蒙漢厚恩身為宗室遺老歷事三主上以我先

帝舊臣每進見嘗加優禮吾而不言孰當言者向遂

上封事極諫曰臣聞人君莫不欲安然而嘗危莫不

欲存然而嘗亡失御臣之術也夫大臣操權柄持國
也 操執 未有不為害者也昔晉有六卿齊有田崔衛
有孫甯魯有季孟嘗掌國事世執朝柄終後田氏取
齊六卿分晉崔杼弑其君光孫林甫甯殖出其君術
弑其君剽季氏八佾舞於庭三家者以雍徹並專國
政卒逐昭公周大夫尹氏筦朝事濁亂王室子朝子
猛更立連年乃定故經曰王室亂又曰尹氏殺王子
克甚之也 其惡言 大甚也 春秋舉成敗錄禍福如此類甚衆
皆陰盛而陽微下失臣道之所致也故書曰臣之有
作威作福害於而家凶於而國也 而汝 孔子曰祿去

公室政逮大夫危亡之兆秦昭王舅穰侯及涇陽

陽君 穰侯魏冉也涇陽 葉陽皆其弟也 專國擅勢上假太后之威三

人者權重於昭王家富於秦國國甚危殆賴寤范雎
之言而秦復存二世委任趙高專權自恣壅蔽大臣

終有闢樂望夷之禍 二世齊於望夷之 宮闈樂以兵殺之 秦遂以亡近

事不遠即漢所代也漢興諸呂無道擅相尊王呂產

呂祿席太后之寵據將相之位 席猶因言若 人之坐於席 兼南北

軍之衆擁梁趙王之尊驕盈無厭欲危劉氏賴忠正

大臣絳侯朱虛侯等竭誠盡節以誅滅之然後劉氏

復安今王氏一姓乘朱輪華轂者三十三人青紫貂



蟬充盈幄內魚鱗左右言在帝之左右相次若魚鱗也大將軍秉事

用權五侯驕奢僭盛並作威福擊斷自恣行汙而寄

治身私而託公寄託也內為汙私之行而外託治公之道也依東宮之尊

假甥舅之親以為威重東官太后所居也尚書九卿州牧郡

守皆出其門言為僚吏者皆居顯要之職筦執樞機朋黨比周稱

譽者登進忤恨者誅傷游談者助之說執政者為之

言排擯宗室孤弱公族其有智能者尤非毀而不進

遠絕宗室之任不令得給事朝省恐其與已分權數

稱燕王蓋主以疑上心示宗室視近而反逆也避諱呂霍而弗

肯稱呂后霍后二家皆坐擅僭誅滅故為王后諱而不言也內有管蔡之萌外

假周公之論兄弟摯重宗族盤互盤結而交互也歷上古至

秦漢外戚僭貴未有如王氏者也雖周皇甫秦穰侯

漢武安呂霍上官之屬皆不及也皇甫周卿士字也周后寵之故處於

盛位權黨於朝詩人刺之武安侯田蚡也物盛則有非嘗之變先見為其

人徵象孝昭帝冠石立於泰山冠山下有石自立三石為足一石在上故

日冠仆柳起於上林其柳已死僵仆於地而更起生而孝宣帝即位

今王氏先祖墳墓在濟南者其梓桂生枝葉扶踈上

出屋根垂地中雖立石起柳無以過此之明也事勢

不兩大王氏與劉氏亦且不並立如下有泰山之安

則上有累卵之危陛下為人子孫守持宗廟而令國



祚移於外親降為皂隸縱不為身奈宗廟何婦人內
 夫家外父母家此亦非皇太后之福也孝宣皇帝不
 樂舅平樂昌侯權所以全安之也夫明者起福於無
 形銷患於未然宜發明詔吐德音接近宗室親而納
 信援引也黜遠外戚母授以政皆罷令就第以則效先
 帝之所行厚安外戚全其宗族誠東宮之意外家之
 福也王氏未存保其爵祿劉氏長安不失社稷所以
 保睦外內之姓子子孫孫無疆之計也如不行此策
 田氏復見於今六卿必起於漢為後嗣憂昭昭甚明
 不可不深啗不可不蚤慮易曰君不密則失臣臣不

密則失身幾事不密則害成唯陛下深留聖恩審固
 幾密覽往事之戒以折中取信居萬安之實用保宗
 廟久承皇太后言社稷不安帝身亦不久事皇太后也天下幸甚書奏
 天子召見向歎息悲傷其意謂曰君且休矣吾將思
 之且令出外休息以向為中壘較尉元延中星孛東井蜀岷
 山壞雍江向惡此異懷不能已復上奏曰臣聞帝舜
 戒伯禹毋若丹朱傲周公戒成王毋若殷王紂詩曰
 殷監不遠在夏后之世亦言湯以桀為戒也聖帝明
 王嘗以敗亂為戒不諱廢興故臣敢極陳其愚惟陛
 下留神察焉謹按春秋二百四十二年日蝕三十六

襄公尤數率三歲五月有奇而一食奇謂成數之漢餘不滿者也

興訖竟寧孝景帝尤數率三歲一月而一食臣向前

數言日當食今連三年比比類也自建始以來二十歲

間而八食率二歲六月而一發古今罕有小大希稠

占有舒疾緩急而聖人所以斷疑也易曰觀乎天文

以察時變昔孔子對魯哀公並言夏桀殷紂暴雷天

下故歷失則攝提失方孟陬無紀攝提星名也隨斗柄建十二月曆不

正則失其所建首時為孟正月為陬也此皆易姓之變也秦始皇之末

至二世時日月薄食山陵淪亡星辰出於四五四時之孟

月也言見太白經天而行太白陰星出東當伏東出西當伏西過午為經天者

四仲也

也無雲而雷雷當託雲繼君之託臣也二世不恤天下人有叛心象獨號令而無臣也枉

矢夜光流星也其射如矢蛇行不正故曰枉矢流而亂伐亂熒惑襲月熒惑主

主刑故趙高殺二世也夔火燒宮夔災也野禽戲庭野鳥入處主人將去都

門內壞長人見臨洮石隕于東郡星孛大角以亡流

犯大角大角因伏不見觀孔子之言考暴秦之異天命信可畏

也及項籍之敗亦孛大角漢之八秦五星聚于東

得天下之象也孝惠時有雨血日食於衝滅光星見

之異日食行交道之衝也孝昭時有泰山卧石自立上林僵柳

復起大星如月西行衆星隨之此為特異孝宣興起

之表天狗夾漢而西流星也墮地為天狗皆妖星久陰不雨者二

冊

宗室部 卷之三百八十七 二十八

十餘日昌邑之不終視孝宣之紹起天之去就豈不昭昭然哉高宗成王亦有雉雉拔木之變能思其故故高宗有百年之福成王有復風之報神明之應應若影響世所同聞也臣幸得託末屬誠見陛下寬明之德冀銷大異而興高宗成王之聲以崇劉氏故豕豕奸死亡之誅今日食尤屢星孛東井攝提炎及紫宮有識長老莫不震動此變之大者也其事難一二記故曰書不盡言言不盡意是以設卦指爻而復說義書曰倂來以圖倂使也使人以畜來示成王明口說不了指畫乃了也天文難以相曉臣雖圖上猶湏口說然後可知願賜清燕

之間指圖陳狀帝輒入之謂招入也然終不能用也向每

召見數言公族者國之枝葉枝葉落則本根無所庇廕方今同姓疏遠毋黨專政祿去公室權在外家非所以疆漢宗卑私門保守社稷安固後嗣也向自得見信於帝故嘗顯訟宗室譏刺王氏及在位大臣其言多痛切發於至誠

劉輔河間宗室也成帝時為諫議大夫帝欲立趙婕妤為皇后先下詔封婕妤父臨為列侯輔上書言臣聞天之所欲必先賜以符瑞天之所違必先降以災變此神明之徵應自然之占驗也昔武王周公承順



天地以饗魚鳥之瑞 謂伐紂有白鳥赤魚之瑞也 然猶君臣祇懼

動色相戒况於季世不蒙繼嗣之福屢受威怒之異

者寧雖夙夜自責改過易行畏天命念祖業妙選有

德之士考卜窈窕之女 窈窕幽閑也 以承宗廟順神祇心

塞天下望 塞滿也 子孫之祥猶恐晚暮今迺觸情縱欲

傾於卑賤之女欲以母天下上不畏于天下不媿於人


惑莫大焉里語曰腐木不可為柱卑人不可以為主

天人之所不予必有禍而無福市道皆知之 市道市中之道

也朝廷莫肯一言臣竊傷心自念得以同姓拔擢尸

祿不忠污辱諫爭之官不敢不盡死惟陛下深察書

奏帝使侍御史收繫掖庭秘獄減死罪一等論為鬼
薪



册府元龜卷終

册府元龜 宗室部

